

Fezekile Futhwa

**[MONYA MATSETE]**

Pokello ya dithotokiso tsa Sesotho.



Published by Nalane  
PO Box 1452  
Alberton1450

Web: [www.nalane.org.za](http://www.nalane.org.za)  
Email: [ffuthwa@nalane.org.za](mailto:ffuthwa@nalane.org.za)

Copyright © 2010 by Fezekile Futhwa

First Published: April 2010

ISBN: 978-0-620-46380-5

**ALL RIGHTS RESERVED.**

No part of this publication may be reproduced, stored in any retrieval system or transmitted in any recording or otherwise without the prior written permission of the author or publisher.

## Table of Contents

1. Qwaqwa Ke Nna Eo!	6
2. Qwaqwa	7
3. Noka	9
4. Madume	11
5. Sentsho	12
6. Nkopeleng We Ke Bine Kgaupe	14
7. O Tshabe Motho	15
8. Tlala	18
9. Bokgabane ba Sesotho	20
10. Bohloko ba Kgutsana	21
11. Hlonepha Moriri Moputswa	23
12. Botle bo Bokale	24
13. Boroko Njare	26
14. Kopano ke Matla	28
15. Kgahliso	29
16. Thope	31
17. Mohanuwa	33
18. Mosetsana	34
19. Matshediso	35
20. Mmadikotwana	38
21. Lengenengene	39
22. Ntidi	41
23. O Ile, O Ile	43

## Monya Matsete

---

24. Pelo Hlomohi	45
25. Makgatheng a Lefu	48
26. Leeto	49
27. E ne Re!	51
28. Boqapi	53
29. Hoja	54
30. Banana ba Ditoropong	56
31. Ba Nkokona Basetsana	58
32. Ke Fellwa Ke Mamello	59
33. Ke Llela Kgwetsa	60
34. Maswabisa Dihlong	62
35. Tshehlana Eo	64
36. Mphempe e ya Lapisa	65
37. Sebueng	66
38. Sekgopi	67
39. Semphu Semphuu Se Nkga Kae	69
40. Heu Helele!!!	71
41. Lona Banana ba Basotho	72
42. Mara Nna Ke Mang He?	74
43. Lefu Leholo Ke Ditsheho	77
44. Mankokosane	78
45. Maru ao a Maputswa	81
46. Pitso ya Badimo	83
47. Molaetsa wa Badimo	85

## Monya Matsete

---

48. Kwape	87
49. Lehafi	89
50. Lerato la Moya	91
51. Ke Raha Moritshwana	93
52. Nna Ke Tla Loya Motho	95
53. Senyamo	96
54. Rasekala	98
55. Podile Nkgwana	100
56. Tlholohelo	101
57. Nkele Morohong	103
58. Ngwana a re Tentsha Tsheya	105
59. Kodi ya Malla	108
60. Baby Girl	110
61. Nna Enwa!	112

## 1. Qwaqwa Ke Nna Eo!

Ntloheleng nna ke menahaneng le mehlala  
Ke totobe ke therekeselle naheng ya Basotho  
Borwa bo Botjhaba Tsatsi  
Hona teng malwanlahleng a dithaba tsa Maluti  
Thaba tsa Luting botle bo hlollang  
Di kgabile ka bosweu ba lehlwa, serame  
Hona teng habo mohatsela  
Ke tle ke hatsele ho re ke qhaqhasele  
Meno ona ke a otlanye sa Ntjheme  
Ntjheme a qhaqhasella pele  
E le ha a disa makgomo ka bo Tsoku  
Tsoku ka mmala wa ona o Thokwa  
Kgomo tseso ka mebalabala  
Di anehilwe sebaeng sa Mekgahla  
Kojwana tsa bashemane ba le thabeng  
Teng ba ilo rutwa kooma, tsebo ya banna ba inotshi  
Qwaqwa nkuhlwe hle lehae la ka  
Pelong ho nna ho runya ntho e se ka ka letho  
Tlholohelo sa ngwana ho mmae  
E le ya ka tlholohelo  
Ka leo la ka lehae!

## 2. Qwaqwa

Tlase tlase metheong  
Dikoting le mangopeng a Bolata  
Mapatsong le mafikeng a haeso  
Mane mose ho noka ya Kgopjane  
Metseng ya Naledi, Namahadi le Boiketlo  
Diphokong le mahaheng a motse weso  
E, teng meriting ya thabana tseso

Diphororong tsa noka ya Kgopjane  
Maphoding a metsi a thabana Phatswa  
Mosikong wa thaba Putswa  
E ya bo, kgabong ya leru le letsho letsho  
La thaba tsa Maluti

Ke re na botle bo kaale ke eng?  
Na kganya le kgotso ke tsa eng?  
Ke ditholwana tsa motse weso  
Qwaqwa e kgabile ka Maluti  
Ka melapo le melatswana  
Ka dithaba le maralla  
Mangope le tsona le dilomo

Dinoka ka bo Kgopjane  
Ke bolela Namahadi noka ya boreneng  
Nka lebala jwang Mphokojwane molatswana  
Botle bo fumanwang naheng ya Basotho  
Moo ho renang kgotso le toka  
Pula ka marothodi  
Jwalo ka leswe ha meso e wela fatshe  
Mehodi e apoha, mme kganya e sunya nko

Bohang ha manemane a thala  
Dinotshi di monya lero la dipalesa  
Dipalesa ka bo shweshwe monko monate  
Dirurubele di ntlafatsa sebae ka mebalabala  
Dinonyana di tswetswetsa  
Ka melodi e monate Dithaha  
Serobebe ka lentswe le phefa  
Motintinyane sehahlaula le maru  
Nka lebala jwang Phakwe

## Monya Matsete

---

Selo sa ho hlwibila Ditsuonyana  
Dithole di sale di itlhopere

Jo mohodi wa Qwaqwa bohata!  
Lehodimo le fetoha sa Lempetjhe  
Le o tsometse hoja o sa ile le kgongwana hodimo  
Sa Ntsu e fokaela sepakapakeng  
Ntsu morena wa dinonyana

Ha ke sa bua ka kganyapa tsa Qwaqwa  
Ntho tsa ho tsosa sefefe sesinyi  
Ntho tsa ho se bonwe matsamaya ka sefako  
Sekgohola sa mohla monene  
Koduwa fatsheng la Basotho  
Ke boo bohale ba badimo

Jo nna botle ba leruo la Qwaqwa wee!  
Mahakonoso a dikgomo tseso  
Nonopelo ya manku le dipodi  
Dikgoho tshupa nako ya Mosotho  
Di mafurafura, sa phoofolo ya thoteng  
Bopaki ba kgora le monono

Tlotlang le be nne le pake  
Ka botle ba lehae la heso  
Ka semaka sa tlholeho, tlhaho  
Le be nne le boledise ka bokgabane ba mmopi  
Ye na ya re fileng Qwaqwa maluti  
Mme le se lebale ba fatshe  
Badimo ba Basotho  
Bona bathei ba  
Lehae la Basotho

## 3. Noka

Ka ema ka hlollwa,  
Ka tlallwa ke naha se ka motwaitwai, moleleri.  
Ka fellwa ke mantswe, ka oma lehana;  
Ya ka ke moshanyana a tjhela kgarebe!  
A sitwa ho ipuella, pelo e uba, a tlakasela.  
A betilwe ke letswalo.

Nna ke hlolletswe, ke maketse;  
Ke makaditswe ke botle bo bokana.  
Setsoto, semaka, mohlolo;  
Mohlolo wa tlholeho, moleko;  
Semaka sa lefatshe, sedimo sebele.  
Ho phalla ha metsi, sefana ka bophelo.  
Ho lelemela ha noka, molapo.  
Ho tswedipana ha yona, matswedintsweke.  
E methinyathinya sa noha sehahabi.

Nqe ngwe ke diphororo, lefafatsane;  
Mohlodi wa bophelo.  
Mafafatsane sehlasimolla melle,  
Sehlasimolla kelello, monahano.  
Nqe ngwe ke kweetsa, bodiba;  
Madiba matala sepata dikakata.  
Bomarena a bodiba ka ho fapana.  
Ka bo kganyapa, ntho ha di bonwe.

Ntho tsa hore di ikotlolla ho thehe meriti,  
Ho ne ya matlopotlopo pula.  
Mohla di fallang teng ha ke sa bua,  
Sekgohola sa kganyapa ho tshabeha;  
Selo se fofa ka leru le letsho tsho!

Nqe ngwe ke molwatswana, qanthana;  
Sebaka sa ho ratwa ke bana, masea.  
Dibobothwana tsa ho rata ho sesela metsing.  
Nqe ngwe teng ke didiba, mangaya lenyora;  
Metsi a mothamo, a morunyella.

Ruri ona ke mohlolo,  
Sena ke semaka e le ruri.  
Bona ke botle ba mmopi sebele.

## Monya Matsete

---

Hoba mariha selo se ptjha ptjhi!  
Metsi a ya balwa, a qadikane;  
Sa meno a leqhekwana.  
Hoba selemo se thwase, marena a bohile nala.  
Ha ke sa bua ka hlabula,  
Hoba tsohle di apere tshiamo,  
Noka e be nne e phophome mabopo;  
E rwalle diphophoma, e kgotshe ditlhokwa.

E rwalla jwalo e le ha e ilo nwesa tse ding.  
Yona e nwesitswe ke melatswana e kgahlehang,  
Melatswana ya malwanlahla a luting;  
Thaba tsa Maluti makgabane a Qwaqwa le Lesotho.  
E nwesa noka ya Namahadi,  
Yona e nwese bodiba boholo Mohokare.  
Tseo tsohle di fellang Lekwa, matjhabeng.

## 4. Madume

Ke hoa madume,  
Ke puka kgotso.  
Ke roka baholo ba rona,  
Ka bo Moshoeshoe ka bo Napo.

E na ke thapedi,  
Ya tloholwana sa Rantsho.  
Tlohoho sa nkgono Nolikho le ntate moholo Phakamile  
Mora mme Mathulo le ntate Zenzile  
Ntata Mohlokalebitso, ngwana maiqapelo.

Ya reng pula ha e ne matlopotlopo,  
Kgotso e rene fatsheng la Rantsho,  
Kgora e ate mme bohle ba nonopele!  
Lesedi le kgantshetse Aforika,  
Kganya ha e atele fatshe la bo ntata rona.

Kgotso, pula, nala. Camagu.

## 5. Sentsho

Ha le mpona ke le motsho tjena  
Ke le mehwabadi ke kgelelletse  
Ke le moputswa sa motho ya kgopane  
Nna botala wa lapa lesa  
Moshemane e motsho tsho!

Le ha sefahleho se sa bonahale  
Ke bonwa ka mahlo a phatsimang  
Ona a tletseng meokgo ka mehla  
Meokgo ya thabo le sesupo sa pelo tshweu  
Le ka wona meno a masweu  
Sa lebesa kgatsela  
Ke motho le nna mponeng

Le ha tsebe di balehile hlooho  
Di le sekapakeng di fohla moya  
Di kgakeleditse ditaba le makumane  
Hore monga tsona a dule a le leseding  
Ka ha thuto ke lesedi  
A dule a kganya kelello ka mehla

Mehwabadi ke ya ditshita tsa lena lefatshe  
Boputswa ke ba serame sa Qwaqwa  
Mariha le mehatsela eo ke fetileng ho yona  
Lehlweng, mane thabeng tsa Maluti  
Tsohle di supa kgolo ya lena lekanyane  
Kabelwa manong ngwana ya sa kgathaleng ka letho  
Monna wa sebele

A na mahlo ke sesupo sa tshabelo pele  
Motho ya sedi, ramaqitolo  
A na meno ona a supa botshepehi  
Monna ya pelo nolo  
Ya matjato, motho wa ho itlhahanela  
Nna tlhalentlhajana ka seqo

Bang ba mpitsa Malefetsane  
Bang ba mpitsa Veze, kapa ke yona Fetsi?  
Fez le yena Fezi kaofela  
Mafez le Mafezola  
Wena athe o mpitsa mang?

## Monya Matsete

---

Tsena tsohle tse supang botebo  
Ba enwa mohlankana  
Le kweetsa ya Tshabanana ha se letho  
Papisong le enwa motho!

Se nkgelle fatshe ka seemo sa ka  
Kapa ka yona tshobotsi  
Ke nna ntshonyana ya Bolata  
Sentsho wa Zenzile le Mamokgele  
Sentsho ngwane motona  
Sentsho ngwane motsho tsho!

## 6. Nkopeleng We Ke Bine Kgaupe

Nkopeleng we ke bine kgaupe  
Ke tle ke otle lehlaso, ke bine  
Ke tlerole hore lentswe la ka letjhe  
Ke ome qoqotho sa setitimi se matha lebelo  
Setitimi lenqosa, motlalehi wa ditaba

Nkopeleng bo ke bine kgaupe  
Ke bine maikutlo ohle a ka  
Ke ntshe se tlase botebong ba pelo ya ka  
Ka ha pina ke pheko ho nna  
E phekola mahlaba e tlisa nyakallo  
Ke tlelwe ke kgotso ya Mosotho leja pere

Nkopeleng mahofi bo, ke kopane hlooho  
Sa Lethuela le futuhelwa ke moya  
Moya wa bongaka mpho ya Badimo  
Setsokotsane se futuhang hara maikutlo  
Mme se tsokotsa se thefula maikutlo  
Sa Lekiritshwane sefefa sa moya

Tlatselang diatla hleng ke thefulehile  
Ke tsetselela pina, ke nyoretswe lehlaso  
Mme hore ke bokolle sa ngwana lesea  
Ka ha ke thoko feela e ka ntshang letshweya  
Ho nna monna Mosotho, monna monyathohi  
Ke llela motsotso le sebaka  
Tsa hore ke tle ke kgabe ka bokgeleke  
Ke thunthetse sebaeng mme ke hobeke  
Lerole ke le kuputse sa dipitsi lebelong  
Tsena tsohle ka lehlaso la pina  
Ka lentswe le phefa phefa

## 7. O Tshabe Motho

Ka tla ka utlwa bohloko nna nthwana batho  
Moya wa ka wa tla wa ameha bo  
Ka ba nna ka bona meokgo e seka mahlong  
Ke itse ke ya thiba, empa dikeledi tsa rotha  
Ka ba ka lebala hore hana ke monna  
Mme monna ke nku ha a lle

Nna tsa ka dikgapha ha se seboko  
Ya ka meokgo ha se bokwala  
La ka leqeba ke la moya  
Ha ke bona ka moo tjhaba sa Rantsho  
Se sotlehang ka teng  
Fatsheng lena la bo ntata rona

Ntshonyana e phela ka mamina  
Hohle moo e yang teng  
E teana le mathata maima  
E ka rona re mmutla wa dintjeng  
Re tetekwa ke bohle  
Mme re hlekefetswa ke bohle

Bana ba hlobotse e bile e ka ba na le mofomfonyane  
Feela ntata bona o ya sebetsa o leba mosebetsing ka mehla  
Monna batho o sebeletsa ntata selala  
Ka ha baditjhaba ba ikabile ka lefa la Rantsho  
Ke barui ba hafa ka nkatana  
Ba mpa ba hlotjhwa ke ntsintsi feela  
Ka ha yona e sena leeme  
E hlopha mofutsana le morui ka ho tshwana

Mosadi wa batho o tshwere bothata  
O emme le monna wa teneng a sa tsebe hore sejo se tla tswa kae  
Ntata Thabo ha e sale a nyamela makgoweng  
A ilo batla tjako le borotho ba bana  
Jwale Mmathabo o hlolletswe  
Ha a tsebe hore o tla leba ha mang ha ho le tjena  
O mathile malapa ohle a kopa thuso  
Ha ho lapa leo a senang molato ho lona  
Mosadi wa batho a kgwatlella bana ba hae  
Hore ba mpe ba lale ba jele

## Monya Matsete

---

Nkgono Mamodiehi qhekwana la batho  
Le bile le tshwerwe ke pelo ke ho ingamangama  
Le ipotsa dipotso ka ditloholo tse kaana  
Tseo e seng e le mojaro wa hae  
Ka ha bana ba ile le naha  
Ba ilo sela le ho batla tjako  
Empa le bohobe bo paala nkgono a sa bo bone  
O ipotsa ka mehla hore ba hae bana ke ba jwang  
Ba siyang leqhekwana le sehlopha sa masea  
A hlokang mohlokomedi

Abuti Sethunya yena ha ke sa bua  
Ka ha monna wa batho o bothateng  
Mosadi o mo siile le bana o ile!  
Ha pelo e ja serati  
Monna wa batho o tlaletswe ke naha  
Ka bana ba masea le barwetsana  
Mosadi yena o ja monate wa lefatshe  
O lebetse ka bana ba hae le monna wa dikgomo

Athe motho ke sebupuwa se jwang?  
Se soto ha kaale lefatsheng  
Se tlišang matshwenyeho le ditsietsi  
Ntle le qenehelo ya letho  
E itse ba bolela batho ba kgale  
Ba re ha o tshaba o tshabe motho  
Ka ha ho robala ke ho fetoha  
Mme ho molemo ho tshepa lejwe

Tshotleho e kaale lefatsheng  
Empa bang ba ja monate wa lefatshe  
Ba lebetse ka batswadi, mme le ntate  
Ba lebetse ka bana, Thabo le Modiehi  
Ba lebetse ka nkgono, setsohatsana sa modimo  
Ba lebetse ka malapa a bona, ao ba itlammeng ka wona

Ha o tshaba o tshabe motho  
Ho bona motho a thaba  
A keteka a natefelwa  
Empa a siile dibonwang morao moo a tswang teng  
A lebetse sa leqheku le batla tsela  
Ho re o na le bana hae moo a tswang  
Ho re o na le batswadi moo a tswang  
Ho re o na le molekane moo a tswang

# Monya Matsete

---

Ho re o na le boikarabelo moo a tswang  
Tjhe o mo tshabe motho!

## 8. Tlala

Ba dutse ba omeleditse melomo  
Ka dipounama tse shwashwathihileng  
Melomo e meputswa pududu!  
Putswa ba sehwapu sa pitsi mantatana  
Phoofolo ya ho ratwa ke basotho

Bohloko ba komello ya molomo  
Bokeke ba lekwangwa  
Ka ha bohloko ba seeta bo utluwa ke monga sona  
Ena tsietsi e tsejwa ke ya lapileng  
Ya labalabelang ho yang ka maleng  
Hore moya o tle o kgotsofale

Kgabareng dipounama di ya petsoha  
Petsoha ya letsopa le utlwa letsatsi  
Letsatsi motlisa kganya ho batho  
Empa le tlisa masisa pelo ho dikowa  
Ka ha le ba hopotsa hore mpa e lapile  
Ka ha mpa yona e sena mokitlane

Hang ha letsatsi le phunyeletsa  
Kganya ya lona e bonwa lefatsheng  
Mpa ke yona ya pele ho tsosa morobadi  
E mo hopotsa hore wa hao molato o o letile  
Ke mamelletse ho lekane  
Mala a bile a manamme mohodu  
Ke ho hloka ditheohelang

Jo nna na wee!  
Bohloko ba tlala bo keke ba lekwangwa  
Bokaka ka pheletso ya bophelo ho monga bona  
Ke morwalo oo ho senang mojarolli wa ona  
Ka ha mpa yona e hloka dihlahunwang  
Molomo o labalabela tatso  
Mmetso o lebelletse ka tebello  
Mothamo mohlang dijo di fumanehileng

Ruri lena lefatshe le sehlooho  
Ka moo batho ba sotlehang ka teng  
Ba hlokang ke re le ho theohelang feela  
Empa bang bona ba gora kamehla

## Monya Matsete

---

Ba ja sa mpana phatloha  
Ba bile ba lahla dijo ka ha e le matletsentletse

Tlala o sehlooho e bile o sera  
Ha o hlomphe e bile ha o na mekgwa  
Ha o swabele ke re le bana ba banyenyaane masea  
O hlasela bohle ntle le leeme  
O lebetse hore bana ba batho ba hula ka thata  
Ka ha lena lefatshe le ba kgesa  
Empa wena ha o kgethe mofo ho morui  
Bohle o ba etela ka ho tshwana

Na o tla ba le mohau mohla ho thweng?  
O ke o fe bana ba batho letshweya  
Ba ke ba dule ka ho iketla le bona  
Ba ke ba lebale ka wena mosotli towe  
Le bona thabo le monyaka ba ke ba ditsebe  
Ba tsebe bokgabane ba ho phela  
Ntle le mpa e ipatlelang tefo feela  
E sa natse mathata a monga yona.

## 9. Bokgabane ba Sesotho

Na ngwana Mosotho ke eng  
Ntle le maqiti le boqheteke  
Ntle le botjhatsi le tjebelo pele  
O hlomphe Mosotho  
O tlotle tloholo sa Moshoeshoe

O tle o bone ha Mosotho a thalatsa  
A etsa menyakwe, a qila  
A thunthetsa a bile a tjeka  
Ho tjha leoto motho a paqa  
Banna bona o thole ka mohobelo  
O tshabe lekako le Mosotho

Na bothata ke eng ka majakane  
Ona a re hlapaolang bosiu le motsheare  
Bana ba lebetseng sehahabo bona  
Mme ba kgahlwa ke tsa baditjhaba  
Ba nyedisa Sesotho ba hlapaola badimo  
O tshabe ho hloka mokgubu ha motho!

Nna ke re thala o kgabe ka botjhaba ba hao  
O howe ka lentswe le phefa mme o tlatlarietse  
O boke mme o theoletse  
Botle le bokgabane ba Sesotho  
Letlotlo leo re le fuweng ke Modimo Tlatlamatjholo  
Ra nto le sielwa ke badimo ra rona

## 10. Bohloko ba Kgutsana

Fatsheng lena la mahlonoko  
Moo phokojwe ho phelang e diretsana  
Moo mehono le bohlabaphiyo di iphileng matla  
Moo ya senang sekaja ho thweng mmae a tele  
A tele a be nne a telle motella ruri  
Ka ha fatsheng lena ho sa qellwane

Ha lena lefatshe le ntlela ka mehlolo  
Ka mahlonoko le maqakabetsi  
Ha ditsietsi e le bohobe ba ka  
Ka mehla le matsatsi  
Mme ke lla sa mmokotsane ke hona  
Ke lla sa ngwana lesea sa ngwe ngwe

Ha bohle ba tshabela malapeng  
Ba fella ho batswadi ba bona  
Moo teng ba fumanang tshehetso le tataiso  
Nna ke motwaitwai ngwana ya inotshi  
Kgutsana moleleri, motwaitwai  
Ngwana ya hlokang moeletsu  
Ngwana ya tsetselelang mmae  
Empa a hloka mang we!  
Ka ha mmae a ile badimong  
Moo bohle re tlang ho fella teng

Jo nna we sehloho sa kgutsana  
Ke mmutla wa dintjeng mme o sotlwa ke bohle  
Ka ha a hloka mosireletsi le mmuelli  
Mma ngwana ho tshwara thipa ka bohaleng  
Mme kgutsana e hlwephetsa mamina ka mehla  
Ka ha lena lefatshe le le madimabe  
Mme kgutsana e phela ka mamina

Ha bohle ba thabile  
Ba bile ba thalatsa ke hona  
Tlhare e lelekisa tsebe  
Mme mahlo e keketlisa meokgo  
Sesupo sa monyaka pelong  
Kgutsana yona e hlorile  
E hopola ka mma yona

## Monya Matsete

---

Mabatleng moo a robetseng teng  
Mme yona e setse e sotleha fatsheng lena

Ruri sekgobo sa ho ba kgutsana  
Fatsheng lena la basotli  
Bo fetisa ke re le sekgobo sa bootswa  
Ka ha kgutsana e le sono ho lena lefatshe  
Fatsheng la meharo le pelo kgopo  
Ka ha yona e hopola mabatleng ka mehla  
Moo ho robetseng mma yona  
Yena mosireletsi le mooki wa kgutsana  
Ho bona bohloko ba ho kgojwa ka mehla  
Ho ba kgutsana sekgobo hara dikgobo

## 11. Hlonepha Moriri Moputswa

Kgotso le tlotla di be ho maqheku a rona  
Tlhompho le boikokobetso ho moriri o moputswa  
Ke boka makgomo, ke ya dumedisa  
Ke le rolela kgaebane botedu putswa ba tjhaba sa Rantsho  
Lona ditsohatsana ka meno a qadikaneng  
Ke kobotetsa hlooho ka tlhompho  
Ke re le re holele hleng, beng ba ka  
Lona Medimo ya bana  
Badimo ba rona ba ka moso  
Kgotso ha e ate  
Pula di ne matlopotlopo  
Ha e be kgora le nala  
Le tle le dule le hopolwa ke ditloholo le tsona ditloholwana  
Ka ha motswadi ke Modimo wa ngwana  
Ke thenthetsa ke bile ke qhelaka  
Pelo ya ka e tletse thabo le monyaka  
Nyakallo ya mohlolo  
Ka tlotla ya ho ba le lona fatsheng lena  
Ya ka thapedi nna ke se ke e entse  
Ka re Tlatlamatjholo Modimo e moholo  
Yena Modimo ya botshabebo bo fetisang  
Re inele matsoho metsing  
Rona tloholwana sa Rantsho  
Ka nyediso le tlhapaolo ya metsofe  
Ka boela ka le lala ka tadima Botjhabela  
Teng Ntswana Tsatsi, tlholehong  
Ka hoa ka lentswe le phefa ka re:  
Ho lona Badimo ba heso  
Lona bohle ba tjabana seso ba ileng boya batho  
Ha e lale bo!  
Le rona makwala re tle re none  
Se furalleng tjabana sa Rantsho  
Ka ha re hloka tataiso ya lona baholo ba ka  
Ke mpa ke ithapella nna motjhana Bataung  
Ke bile ke etsa teboho ka bona bophelo  
Kgaphukgaphu ya mahlohonolo e fumanwang maqhekung eso  
Tsona tshiya tsa tjabana sena sa heso  
Ke re kgotso e re aperele tjhaba sa Rantsho  
Lesedi le re tjhabele ka mehla

## 12. Botle bo Bokale

Jo nna we!  
Ka tla ka hlolla hleng  
Ka utlwa ke sa tsebe hore ke etseng  
Ke itabolele kapa jwang  
Ke itabanye kapa tjhe  
Ka nnete ke hlolletswe

Na banna ke ya lora kapa tjhe?  
E ba mahlo a ka a ya nthetsa  
Ka nnete ha ke kgolwe  
Ka nnete ruri hona ke setsoto  
Bona botle ba tshomong bo bolelwang

Ke bile ke timellwa ke tlhalohanyo  
Ke fellwa ke mantse a ho babatsa  
Bona botle boo ke bo bonang  
Ke qetella ke oma ka hlooho  
Ka ha a ka maikutlo a sisimolohile  
Ka qetella ka ho letsa molodi  
Ona ke mohlolo ruri

Banna e be ke ya lora kapa jwang  
Ntlatseleng hleng ke tle ke phaphame  
Ke tle ke kgutlelwe ke mehopollo  
Ke boele ho lena la ba utlwang  
Mahlo a ka a tle a boele a bone sentle  
Ka ha ke sa dumele seo mahlo a ka a se pakang

Ao tjhe, kgotsang mesebetsi e metle ya Mmopi  
Babatsang bokgabane ba hae ka nako tsohle  
Le roleleng kgaebane dintle tse bonwang ke mahlo  
Hore ona a ikgolele mme a ikgodise  
Ka ha ona ke diala mme ha a je sa motho

Ka nnete nete ya morena ke ya qala  
Ho bona mohlolo o tjhena  
Ngwana towe, o motle ba ho jwetswa  
O motle ba botle ba tshomong  
Botle bo mona boo ho badiswang ka bona  
Mme e le ha nna ke iponela ka ana a ka mahlo

Ruri botle ke ntho e kgahlehang e le ruri  
Ke dijo tsa mahlo, mme ke bohobe ba moya

## Monya Matsete

---

Bo kgahla mahlo mme bo aka maikutlo  
Bo nonya methapo kutlo  
Bo qetelle ka ho edisa sefahleho  
Mme sona se tlale lebono le pososelo  
Ka sena se bonwang ka leihlo la nama

### 13. Boroko Njare

Boroko njare  
Siung bona bo batang  
Ha meya e foka ha sesane  
E ka Medimo e ntshitse moya  
Medimo ya phonyohelwa  
Mme mesi ya entsha ka lengope

Boroko a ko o njare  
Ha mahlo a ka a le boima  
A imetswe ke sephume sa boroko  
A nkeka a bile a nkgohela  
A nkgulela hole hole!  
Teng ha bo Kgakgi

Boroko njare hle  
O tle o ntopolle  
Boloing bona bo kaale  
Le ha kelello ya me e le tjhatsi  
Empa ke kobotetsa hlooho sa letahwa  
Ke mpa ke tahlilwe ke monate wa boroko

Boroko njare bo!  
Ke se nna ke kebikebisa hlooho  
Sa motho ya tletseng mafomfonyane  
Ke mpa nna ke arabela pitso  
Pitso ya beha hlooho mosamelong  
Hore kelello e tle e nke leeto  
Leeto la ho ya boya batho  
Moo teng ho tsebang ya ka kelello

Ruri mmele wa ka o labalabela phomolo  
Hore masapo a iswe ho beng  
Teng o tle o lefwe ka kgatholoho  
Mme kelello yona e tle e tshereme le masiu  
Tlase seriti sa boroko le ditoro  
E lebile moo ho tsebang Modimo le Badimo  
Fatsheng la moya, fatsheng la ba sa utlweng

Boroko wena o sera  
Wena wa ho ntsometsa hoja ke hlaplohile  
Ke qhwaollotse kobo, ke robile monakedi  
Wa tlhasela sa mabotho a ba direng

## Monya Matsete

---

A tliilo rinya bohle mme lefu le nka sebakeng  
Wena moqhekanyetsi e moholo wa moto

Siung bona ba kajeno  
Ke ya kopa mme etsa thapedi  
Ke ithapella ho Modimo Tlatlamatjholo  
Ke kopa ho Badimo ba heso  
Ke re boroko nkapare hle  
Nna kgutsana ya batho ke ithoballe  
Ke tle ke lebale mathata le maima  
A lena lefatshe la ba utlwang  
Ka ha ho wena ke fumana botshabelo

## 14. Kopano ke Matla

Letshwele le beta poho  
Ka ha ntja pedi ha e hlolwe ke sebata  
E bile bana ba motho ba arolelana hlooho ya tsie  
Ka ha baba ba motho ba tsebana ka meropo

Batho e ka kgona ba ipope  
E be ngatana ngwe  
Ba tle ba pheme ditsietsi le mathata  
A lena lefatshe, ka kopanelo  
Ka thusano, ka lerato  
Ka ha bana ba kgwale ba bitsana ka melodi

Karohano e tlisa tlhoboho  
Ke sesosa sa pherekano le manyofonyofo  
Merusu le tsona dikgoka  
Fatsheng lena le meutlwa  
Mme o hopole hore ha bo mohale ho phelwa ka mamina  
Mme ha bo boi teng ha ho lluwe

## 15. Kgahliso

Ka nnete ke re botle bo ya tswallwa  
Ke bile ke paka hore botle ke neo  
Neo ya mmopi Ramasedi  
Botle ba tsa hae diatla  
Lefa le tlotla ya bakgethwa  
Tjhabeng sena sa Rantsho

O fela o le motle ngwana towé  
Ba hao botle ke dijo tsa mahlo  
Ka ha ke o boha ka mehla  
Ho fepa a na a ka mahlo  
Empa ke sitwa ho kgotsofala  
Ka bona botle bo mahlong a ka

E ka nka o kakatlela ka tsena tsa ka diatla  
Mme ka se o lese, ke ikgodise ke hona  
Ho kgotsofatsa wa ka moya  
Pelo le maikutlo, ho wena kgalala  
Ngwane motle semomotela

Molodi wa lentswe la hao tsebeng tsa ka  
Le duma sa tswere mohlakeng  
Le nkotla tlase tlase maikutlong  
Teng moo le thobang methapo kutlo  
Hore ke ikutlwe ke lokolohile  
Mme ke le kgotso ke hona  
Kgotso e tliswang pelong ya ka  
Ke wena ngwana wa ditjhaba

Na ke eng se ka etswang ke motho  
Ho tlosa sena sekgobo  
Sekgobo sa ho kgahlwa ke matshela dinokana  
Dijo tse sa jeweng ke bana  
Ho hapeha maikutlo  
Ho kgodiseha mehopolo  
E ya bo, ka kgahlwa ke none e feta  
Ka ha nna ha ke o tsebe thope  
O mpile wa ikela ka ya ka pelo  
Mme wa ntlhokisa sebaka  
Sa ho ntsha letshweya

Boinotshing ba ka  
O aparela kelello ya me

## Monya Matsete

---

Mme o hapa mehopolo ke hona  
O ntlhokisa le sebaka sa ho inahana  
Ruri o soto ngwana towé  
Ka yena tshotleho  
Tshotleho ya moya

Ha ho ne ho kgoneha  
Ke ne ke tla ikukela wena  
O tle o be wa ka mme le nna ke be wa hao  
Ho lena leeto la bophelo  
Re tle re ntshane se inong  
Re tle re hlotjhwe fela ke yona nta  
Ka ha yona e hloka maitseho

O motle o wa kgahleha thope  
O mosadi sebele  
Mme ke rapela ke hona  
Hore ka le leng la matsatsi  
O tla nkimolla ho e na tshita  
Ya ho hlaselwa ke mehopolo ya hao  
Wena kgarebe e ntle mohaladitwe

## 16. Thope

Ke itse ke itsamaela thoteng  
Ke lebile ha maoto mpepe pelo nkise  
Ke jarilwe ke maoto a ka  
Ke etelellwa pele ke mehopolo ya me  
Yona feela e tsebang moo tsela e lebileng teng

Ka tla ke tjadimane le palesa  
Kgarebe hara makgarebe  
Ngwana ya mmala o kgunong  
Ya marama a butsweditseng ka hare  
Se ka lehapu la lehwetla  
Ya motle banna ngwana mosotho!

Ka ema ka mo sheba mahlong  
Ka re dumela wena thope  
Wena motho wa ho ntsometsa  
Wena wa ho harasa mehopolo ya ka  
Wena wa ho phahamisa maikutlo a me  
Empa ke qala le ho o bona

Ka re o be o phele hle mannyeo  
Kgaitsemi ya motho  
O re phelele le ha kwana nna ke tsielihile  
Ke tsieditswe ke bona botle boo ke bo bonang ho wena  
Botle bo mona ba dihole  
Ngwana towe o motle e ka ke ya lora  
A ko nkake hle nnake  
Ke tle ke tsebe ho phaphama ho ena toro

Na ngwana towe o ntse o le kae nako yee yohle?  
O ntse o ipatile kae moo nna ke sa fihleng?  
Na o le fiswana la ofe motse ke tsebe  
E le hore ke tle boele ke ete  
Ke fihle ke o hlwibile nna ntshonyana ya Makwayi  
Ke o hlwibilele hole sepakapakeng  
Moo ho phelang dinonyana ka bo Ntsu  
Yena morena wa dinonyana sebele

Thope wa tla wa ba lonya ke o jwetse  
Hobane ke ne ke iphomoletse ha o tla fihla  
Ke ne ke robile monakedi mme qhwaollotse  
Ha o tla kena mehopolo ya ka ka lehare  
O ntlosa mehopolong ya ka

## Monya Matsete

---

Mme o kenya wena kelellong  
E fela ruri o le mothohadi ngwanana

Hoja o no sa nyalwa le wena mannyeo  
Ka ha ke bona palo monwaneng  
Ke ne ke tla o ruta lerato  
Ke o rute botle ba lona ka ho phethahala  
O qetelle o ikana ka ba heno  
Hore nna ke tla ba wa hao ka mehla  
Jwale o ile wa potlakela lenyalo  
Ke moo o tlang ho fetwa ke kgeleke e na

Mora enwa wa Makwayi le Bataung  
Motho wa ho tetemisa dithope mangwele  
Ngwana batho a iphumane a lla sa mmokotsane  
A lliswa ke monate wa lerato, maikutlo  
Monate wa mantswe ditsebeng tsa thope  
Bokgeleke bo ya tswallwa nna ke o jwetse

Jwale wena o se o nkuwe  
Ke tla mpe ke bohe bona botle ba hao  
Ke kgole ka mahlo feela sena setsoto  
Ke tle badise le pele moo ke yang  
Hore ke bone seilatsatsi ka lena letsatsi  
Hore ya ka pelo e hapuwe ke mofeta ka tsela  
Moditjhaba ngwana wa ditjhabeng  
Ke tla dula ke o hopola ka mehla thope

## 17. Mohanuwa

A ko mpulele pelo  
Ngwana e motle, pabala;  
Ha ke o nahana ke fellwa ke mehopolo,  
Hakwe la pelo, semomotela.

Mamela ke o bolelle,  
Ke o qhatsetse, ke o amele;  
Ke be nne ke o qotsetse ditaba,  
E, ke o kumele makume  
Ditaba tse kgolo.  
Pinyane e bolelwang ka Sesotho,  
Botedu putswa bona ba bua ka kooma;  
Sephiri sa banna ba Basotho,  
Sa ka sephiri ke sa maikutlo.

Ke re o kganya jwale ka letsatsi,  
O phatsima sa dinaledi;  
Ho nna o senakangwedi,  
O halala le mphatlalatsane.

Hlathe e lelekisa tsebe,  
Ka mehopolo ya hao feela!  
Lebonyo lona ke la mohlolo  
Ha ke hopola setsheho sa hao.

Setsokotsane sa maikutlo sona,  
Ha ke sa bua!  
Se feralla sa moya o putla,  
Hloho sa role le lefubedu mohla monene!  
Tjhaba tsa ema matlotlosiya,  
Dihlolletswe ke mohlolo;  
Role la kuputsa la ba la feresa,  
La baka ditsietsi le masetla pelo.

Ruri o fela o le kgabane  
O ngwana e motle ya seriti.  
Kgeleke ba ka bo ya ntimella  
Kamehla ha ke o bona.  
Ho rene kgotso le nyakallo maikutlong.

## 18. Mosetsana

Ba mebala e metshwana, ba ba tshwana  
Ba mebala e kgunong, ba ba sehla ka tshobotsi  
Bang ba mebala e sootho, ke diponono tsa motse weso  
Bang ba batsho tsho, tlalo le boreledi ba lejwe la moralla  
Athe ba bang bona ba kganya kganyang, ke di ila tsatsi ba di bolelang

Ha ke sa bua ka seemo sa ngwana mosotho  
Thena e kgutshwanyane sa thokolosi selo sa bosiu  
Bang ba seemo se tsweling, mme ba phahametse mahodi  
Bohle ba ya lelala ho tadimana le bona mahlong  
Ka ha tsena dithope di nkile mehato  
Mme di tshabile lefatshe

Ha o sheba seemo sa ngwanana  
Tlhafu di tswile pele, ke menoto e phatsimang sa seipone  
Tlhafu ke diketela tsa ngwana mannyeo  
O hata sa tlou mosasanki  
Selo se kgantsha tlhompho le boikokobetso

Ka morao ka mona teng ha ke sa bua  
Hela motho o fuwe bo ke Ramasedi!  
Disanthao ke matletsentletse  
Ke dithothomela ntho tsa ho qwaketsana  
Ntho tsa ho dumela morethetho  
E ka motho o ntse a hata leoto

Leoto lena lona ha ke sa bua  
Ke sejwabela pitikwehadi ya lento  
Bophara ba leoto la ngwana mosotho ho kgaba  
Le kgabetse tsela le motjeko  
Ha re bapala mankokosane pula e ya na  
Re bile re titima ka lebelo lesokwaneng  
Re qela ho leoto, leoto mpepe

O maramarama ngwana batho  
O hlile o atlehile mmeleng mona  
Nqe ngwe marama a dikotikoti, sa seponono mmabotle  
Bang ba letshwao la bommabotle sebele  
Sehloba nthwa ho hlaha ba ikgethileng feela  
Eya bo! Bana ba madi a hlwekileng  
Tsopa le letle tle la mmopi

## 19. Matshediso

Ka tla ka sarelwa  
Ka sulafallwa, mme ka ba bosula  
Tsohle tsa ba lerotho ho nna  
Mme bophelo ba fellwa ke moelelo  
Ka pona sa bohwele ba poone bo fumana letsatsi  
Ponang Basotho

Ruri bona bophelo bo ntlela ka ditsietsi  
Tsona tseo ke di tholang ka dilopi  
Masetlapelo ona ka mehope  
Pelo hlomohi feela le meokgo  
E ka nna ke furalletswe ke badimo  
Mme ke lla sa mmokotsane ke hona

Ka ipatla mme ka itekola  
Mme tsohle tsa ntshupa hae  
Morao moo ke tswang teng  
Qwaqwa, thaba di mahlwa  
Kgomo boela hae o hodile  
Lapeng leso bodutu bo iphile matla  
Lapa leso le hloka ngwetsi, sekga metsi

Ka hopola lelapa  
Moahelwane, moahisane  
Lelapa le hlomphehang le tsotehang  
Moo teng ke kgahluweng ke serumula  
Ke iponetseng ngwane motle semomotela  
Ngwana ya seemo, ya ditshika  
Matshediso, ngwetsi ya lapa leso

Wa tla wa nkgapa maikutlo ngwana towe  
E ba ke kenwe ke eng ha kaale?  
Hore ke hapehe botho bohle ba ka  
Sa lesea le thabela sefutswelo  
Ruri ke kgodisehile ke wena thope  
Hore o fela o le lehopo la ka  
Wena ke tlang ho ntshana se inong le wena  
O be thaka ya leihlo la ka

Mehopolo ya ka e farasa ka mehla  
Ha ke nahana ka wena, naletsana  
Setshwana sa ho imolla maikutlo a me

## Monya Matsete

---

Mme ke labalabela ho o bona ka mehla  
Ho utlwa monate wa lentswe la hao  
Molodi sa tswere mohlakeng  
Ha ke o bona teng, ke hlajwa ke ditsenene  
Mmele wa me o a bajwa  
Ke sehlooho sa lerato le senyekgenyekge  
Rato la ka ho wena Tshidi

Nkntlwe hle nnake, kgaitsemi ya motho  
Ha ke re ho wena ke o rata sebele  
Ke fellwa ke mantse a ho itlhalosa  
Bokgeleke bo a mpalla  
Mme ke fetoha lethola, semumu  
Ka bona botle ba hao  
Ngwana mosotho, seithati  
Ke iphumana ke tlaila ke hona  
Ha ke lokela ho lotomanya taba  
Ka ha ke tlakasela pela hao  
Ke hailwa ke letswalo  
Tswalo la monna lesedi la hae

Ka tla ka thaba ho tsebana le palesa e kang wena  
Ngwana ya seriti, mosadi sebele  
Ruri le Mme o tla phomola ka kgotso  
Badimong moo a leng teng  
Ka e na ngwetsi ya hae  
Ho tla mo tsoetsa motse  
Mme bohle re ate, kgotso e rene

E fela mosotho o nepile  
Ha a ne a re lebitso letle ke thoriso  
Ka ha la hao lebitso le ntsosa molota  
Ke tsoha morolo ke kgopolo ya hao  
Mme moya wa ka o lokolohile ke hona  
Ka ha ho wena ke fumanne bophelo  
Ka ha o fela o le mosadi wa sebele

Ke leboha modimo le badimo ba heso  
Ka ena mpho eo ke e fuweng  
Lehlohonolo la ho tseba kgalala e kang wena  
Tlotla ya ho itela ho wena kgosatsana  
Mme teng ke qele lerato le kutlwisiso  
Ka ha la ka lerato le kgaphatseha  
Le bile le phophoma, le lebisitswe ho wena

## Monya Matsete

---

Wena thope ya Bafokeng  
Tloholo sa Basia

Ya ka pelo o ikgapetse yona  
Wa ka moya o o hlwibitsi  
Sa phakwe e hlwibila tsuonyana  
Ya ka mehopolo e kgodisehile  
Ka bona botle bo bonwang ke mahlo a ka  
Ka a na makgabane a fumanehang ho wena  
Ya ba ya ka ke toro ho nna  
Hore e feela ke bile lehlohonolo  
Ka ha tsa ka ditsietsi di ntlhobotse  
Mme ho setse thabo le monyaka

Ruri botle ba lerato bo a tsoteha!  
Ka ha ke o rata ke tiile  
Mme ho wena ke bona bokamoso  
Mofumahadi, moratuwa le molekane  
Nthate hle re tle re nkane  
Mme re peseletse mmoho ka bona bophelo  
Ho isa mathuleng a bophelo  
Moo teng re tlang ho putswa ka moqhaka  
Sa bahlabani ba etswa ntweng  
Sa marena le makgabane a ona  
Sa bahale dikwakwariri  
Ka ha ke seo re tla beng re le sona  
Bahale, bahlabani le ona marena  
Ka lena lerato

## 20. Mmadikotwana

O botsho ba pilo  
Mosidi leshala ka botsho  
O hlola ke re le mohla ho thweng o hlatsuwe  
Wa kurutletswa wa ntano tsokotswa  
O dula o le motshotsho!  
Ya ka wena o louwe ka botsho  
Kapa o fosuwe ke letsolo  
Mohla baloi ba motse weso ba neng ba lwana  
Ba e hlanaka hore ya boi a tjetjhe

Bohle ba hana ba latola  
Ha ba lokela ho o kuka  
Ho ya mane motsheo, moo teng o iphumolelang ka kgotso  
Ho dula o lebelletse mohla o tla bitswa  
Ho to pheha masutsa, di dutlisa mathe  
Dihlabosang tsa mmakgonthe

Na bophelo ba mosotho ke eng ntle le wena  
Wena tshiya le tshika ya motse  
Ho seng mosebetsi o ka phetwang  
Ntle le wena ntshwana  
Botsho ya tshepehang motshepuwa  
Ngwetsi ya malapa ohle

## 21. Lengenengene

Matsatsing a kajeno  
Moo tshotleho e leng kobo anela  
Moo bofuma le bofumanehi bo ikabileng  
Moo motho a lalang ka lephako  
Mme a sa tsebe moo bohobe bo tla tswang teng  
Ka ha mathata a hlwele manolo hodimo

Ha re eme re maketse  
Re makaletse batho ba kulang  
Ba kudiswang ke metsi a silafetseng  
Naheng e na eo metsi e leng mantletsetletse  
Empa batho ba shwa la rita  
Sa dikokwanyana di pitlwa ke kutu

Batho ba ema ba tshwere o ka tlase  
Ba qakuwe ke e na qaka  
Ya batho ba bolawang ke hlooho e paala!  
Mafu a phekohang ha bobebe  
Empa batho ba shwa tsatsi le tjabang le le dikelang

Tjhaba sa Rantsho se eme matlotloisiya  
Se tshohile se bile se haketse  
Ho bona mokgokgothwane o bolaya motho  
Ntho ee e phekolwang ka lesoko?  
Empa batho ba kodumela sa menwang  
Ha e kubetswa ka mosi  
Mme e shwa la rita

Na teng nka bua ke reng  
Ka mohlolo wa batho ba bolawang ke letshollo  
Mala a paala a bolaya batho sa tjhefu  
Ho shwa ke re le baholo ba setjhaba  
E ka re feletswe ke mohalakane pheko  
Ho phekola mala, letshollo

Ka tla ka tshoha mme ka hakala  
Ka nyaroha dibete, matshwafu a eba  
Ka betwa ke pelo mme pelo ya sisa  
Ka befa mme ka kgobohelwa  
Ho bona tjhaba seso se fela sa mohodi  
Mohla kganya ya letsatsi e tjabang

## Monya Matsete

---

Mme mohodi o monyela moyeng  
E ka toro e le balehang

Na tsebo ya ngwana mosotho e felletse kae?  
Na methokgo e se e le manyala?  
Ha batho ba eshwa ha kaale  
Empa tsebo le mahlale a le teng  
Ha batho ba kgesa setso sa bona  
Ba kgothalla ho shwa ka masawana  
Empa letlotlo le le lekaale tjabeng sa Rantsho

## 22. Ntidi

Ka tswala ngwana, lekgabunyane  
Poropotlwana ya lesea  
Sebobothwana ka ho kgahleha  
Ntjhanyana wa mmae le ntatae  
Thatohatsi, ngwana wa ho rateha

Thaka ya leihlo la ntatae  
Ngwana wa ho tlisa lethabo  
Ka ha lelepa ke lelapa ka masea  
Ona a tlišang menyakwe  
A phethahatsang ditabatabelo tsa leloko

Ruri Mosotho o boletse  
Ha a ne a re leshala le tswala molora  
Ka ha bana ha ba futse batswadi ba bona  
Ba mpa ba ipetlela ya bona tsela  
Bang ba qetelle e le matlakala  
Tsona ntho di sele

Jo motlotlo wa ho tswala ngwana e motona we!  
Mojalefa wa ntlo ya ntatae  
Yena motswellisi pele wa leloko  
Setswala moloko o tlang  
Bitso la ka le tswelle pele  
Ke tle ke hopolwe ke meloko e tlang

Lena lekgabunyane la tla la ba letle bo!  
Ngwana a ba motle sa ngwana morwetsana  
Poropotlwana e maramarama  
Marama a butsweditse hare sa lehapu la lehwetla  
Ruri enwa moshanyana e ka o phehisana le barwetsana ka botle!

Ka nnete ya mmaruri  
Ke hauhela mosadi ya tla nyalwa ke ena thena  
Ka ha monna o tla siya mosadi hole ka botle  
Mahlo ohle a tobe ho yena  
Mosadi a sale a ponne ke maswabi  
A ho fetwa ke monna ka tshobotsi

Ke itse ke ya tswala  
Athe ke tswala seilatsatsi sa mohlankana  
Moshemane ya sitwang ke mesebetsi ya bashemane

## Monya Matsete

---

A mpa a natsitse ena ya hae tshobotsi  
A ipaballa sa kgarebe e ferehuwa  
Empa enwa e le mohlankana, mora nyeo

Jo nna o bo tshabe botle we!!  
Eitse Mosotho a bolela  
A re sejana se setle ha se jele  
Ka ha enwa wa ka mora  
Ke mora ka lebitso feela  
Empa diketso tsa hae di ya mo latola  
Mme ke llela metsotso ke hona

Na molato ke eng ka enwa wa ka mora  
Ka ha meoka ha a phetse ho arohana le methepa  
O ntshana se inong le bommamesana  
Ke mathe le leleme le makgarebe  
Empa bahlankana bona a ba kwekwetla sebele  
E ka ba mo nkgela sa mokankanyane

### 23. O Ile, O Ile

Maqakabetsing a me  
Ha ke hloname mme ke le bosula  
Pelo e ile mafisa, e tletse mahlwele  
Ke le mabefi sa mohlabani ntweng  
Ke mpa ke bolawa ke tlholohelo  
Yona e ntlhokisang phomolo

Kelello ya ka ka mehla  
E hopola eo ke mo ratang  
Yena moratuwa wa pelo ya ka  
Motho wa ho ikgapela maikutlo  
Le kgopolo ya ka yohle  
E, yena moratuwa wa ka

Ka mehla ha ke le inotshi  
Kelello e farasa  
Mehopolo e badisa ntho di hana ho fela  
Mahlo a ka a lakatsa ho mmona  
Tsebe tsa ka le tsona di hlohlonehela ho utlwa lentswe la hae  
Eo motho ke ya morata hleng!

Ruri karohano e soto  
E bile e swetsa bana batho  
Hoja ba sa thabile  
Ba sa ile kgongwana hodimo  
Ba natefetswe ke monate wa lerato  
Le ona mofuthu wa ho ratwa ka botlalo  
Ntle le leeme kapa lenyatso

O ile, o ile  
Moratuwa wa me  
O nketse hole sebakana  
Hole hole le nna molekane wa hae  
A ntshiya ke le mahlomoleng  
Pelo e balabala ka matsatsi ohle  
Ke hopola eo wa ka motho

O ile, o ile

## Monya Matsete

---

Hole hole dikomponeng  
Teng moo a ileng ho leka bophelo  
Ka ha bophelo ba kajeno ke tjhelete  
Yona eo re sehlelang ka baka la yona  
E le ha re leka letsoho bophelong  
Re tle itshupe le rona bonyeo

Ke re o ile, o ile  
Maratuwa wa pelo le moya wa ka  
O nkuwe ke ntja e se lesapo  
Ke setse ka mehopolo ya hae ke le inotshi  
Ke dutse ka tebello e kgolo ho kgutla ha hae  
A tle a kgutlele atlang tsa ka tse mofuthu

O ile, o ile  
Kganya le letsatsi ha ke sa di bona  
Ke sulafalletswe ke bophelo  
Tsohle ho nna di lerotho  
Ke phela ka dikgapha ka mehla le matsatsi  
Meokgo e keketla mahlong a ka  
E le ha ke hopola eo ke mo ratang

Boya hle, boya moratuwa  
Kgutlela ho nna ke o letetse  
Ke dutse ka tebello sa banna ba lebetse sefifi  
Ke mpa ke hlotjhwa ke lerato la ka ho wena  
Lerato le phophomang sa noka e jele ditlhokwa  
Lerato la ka ho wena moratuwa  
Boya hle, boya hle

## 24. Pelo Hlomohi

Ke hopola hae boholo  
Tlholehong, qalehong ya bophelo  
Ntswana tsatsi, Mosito a bitoha  
Mosotho a tsebahala mme a ata  
Tjhaba sa Moshoeshe ho rateha  
Moshoeshe Moshwaila, ntata tjhabana se setshwana

Ka seka meokgo ho utlwa bitso la Tjhaka  
Tjhaka morena le mothei wa Mazulu  
Tjhaka mohlabani e moholo holo  
Selo sa ho harasa tjhabana tse ding  
A diqhala mme a di qhalla sa ruri  
Ka ha kgang ya monna e kgaolwa ke letlaka  
Hore ntshonyana e fophe madi  
Mme ya boi a di bone matswele  
Hore eo mora Senzangakhona o se a fihlile  
Mme a ikahela lebitso ke hona  
Ka ha re le tjhaba sa bahale

Ka lla seboko sa lesea  
Ha ke hopola ntwana ya difaqane  
Ha ke hopola ka tlala le dikakata tsa mohla monene  
Mohla Tjhaka a beng a qhala bohle  
Hore ya boi a tjhetjhe mme madi a phalla  
Sa phororo tsa metsi ha pula e na  
Empa e le madi a bahlabani ba basotho

Pelo ya ka e ya haroha  
Ha ke hopola ka Mofumahadi Manthatisi  
Tawana ya Tlokweneng ka ho ba mohlolohadi  
E sala le maqakabetsi Montwedi a ile boya batho  
Ho na moo ho sa kgutlweng teng  
Tjhaba se sala le matetsetso a ho qhalakwa  
Ka ha ba ha Mokotedi le bona ke batho  
Mme ba tseka moqhaka tlhola  
Ho Ntlokgolo le Sekonyela

Nka lebala jwang madimo ka bo Rakotswana  
Mohla mosotho a neng a phela ka ho ja motho  
Ka ha lena lefatshe le hlapaotswe ke badimo  
Mme masimo a tjhele tjhang  
Ke badireng mohlang ba kgantshang ntwana

## Monya Matsete

---

Hore ngwana mosotho a bolawe ke tlala  
Yona e sa natseng maqakabetsi a yeo mehla

Ka kgobohelwa ka ba nna ka kgoptjwa  
Ha ke nahana ka mofu Ntshwekge  
Yena motitimi wa sebele wa basotho  
Motho wa ho matha hore a rwale direthe  
E le ha a tshola tlhako morong  
Ka ha ba direng ba mmeile merebele  
Ho nkgamadi sepakapakeng

Le reng ka setsohatsana sa mosotho  
Nkgono Mantsopa ngaka e kgolo  
Molepi le molaodi wa tjhaba se setsho  
Yena wa ho re siela lefa  
Lefa la ditaola  
Ngaka matsetsela nkgekge

Ke lla sa mmokotsane ke hona  
Ha ke hopola tsena dikwakwariri  
Banna le basadi, bathei ba sena setjhaba  
Baboulelli ba puo le moetlo  
Empa kajeno lena mosotho a hlanohile  
A hlanohetse kano le maipelo  
Ka ha a kgahlilwe ke tse ding ditjhaba  
Sa ngwana ya hlokang thuto lapeng  
Thung tsebe, ngwana ya lilelang metsotswana  
Ka ha a sitilwe ke ho mamela

Na lona basotho ba mehla ee le bo mang?  
Na ba lona bokgeleke ke bofe?  
Na a lona makgabane a bonwa kae?  
Na le tla ba dinatla tsa sefe setjhaba?  
Na le tla hopolwa ke meloko e tlang?  
Ka ha le nyahladitse thebe  
Mme la lahla dihlomo  
La kgaba le mehla le ditlwaelo  
Ha lefa la sesotho le haptjwa ke tjhaba tse ding

Na kgeleke tsa basotho ke dife?  
Na ke mang mohlabani wa basotho?  
Ke mang ya tla sireletsa bonono le botjhaba?  
Ya tlang ho nka moqhaka wa tlhoho mohla lefu le fihlang  
Ka ha lona le qholeng ya kobo  
Mme lebitla re le okametse ka mehla

## Monya Matsete

---

Ho kgutlela hae ntwana tsatsi  
Qalehong ya bophelo  
Moo bohle ba tlang ho fella teng

Ya ka pelo e hlomohile  
Wa ka moya o kgupisehile  
Ka maemo a mosotho le sesotho  
Ka botjhaba le mekgabo  
Ka nalane le bonono  
Ba ngwana mosotho ho lena lefatshe  
Tse hatakelwang ka maoto  
Ke tsipasehole le nkele morohong  
Ka ha mosotho a kgahlilwe ke none e feta

## 25. Makgatheng a Lefu

Ke sheba morao moo ke tswang  
Ke lekola tsela eo ke e tsamaileng  
Thota le naha tseo ke diparotseng  
Ho fihleng mona moo ke le teng  
Ke itekola mme ke ipatlisisa  
Leetong lena la bophelo

Motho ke ho itekola  
Ho kgefutsa ha nyenyane  
Lebelong lena leo re le mathang  
Ho ntsha letshweya  
Ka ha phomolo ke toka  
Kgutso le ho ikgutso  
Ntle le tshetiso ya letho

Fatsheng lena ke fahlile mmuso ka lehlabathe  
Ka kgopisa batho mme ka ba kgoka  
Mokgokakwale moleko sebele  
Ntho e sele, ngwana e mobe  
Motho ya lakaletswang bomadimade ke bohle  
Ka ha e le tshita ho bohle

Bophelong bona boo ke bo phetseng  
Ke bile tshika le tshiya ya baena le balekane  
Moeletsi le mothusi wa tjhaba seso  
Mme ke thusa ka lerato le maikemisetso  
Lerato la motho tjhabeng sa habo  
Ke sebetsa ka boitelo le boikitlaetso

Jwale tshiu di ile, lefu le qoleng ya kobo  
Ke kokota monyako wa lebitla  
Mme baheso ba ya nghwehla, ba ya mpitsa  
Ba re ke orohe ka ha la ka lebelo le fedile  
Ke tla orohe fatsheng lena la meutlwa  
Ke lebe hae boya batho  
Moo teng ho sa kgutlweng  
Teng moo re tla fella teng

## 26. Leeto

Ke itse ke nkile leeto  
Ke etile mme ke thabile  
Kgotsofalo e le ya mohlolo  
Thabo e bonwa sefahlehong sa ka  
Ke edile mme ke phuthulohile

E itse le dikela letsatsi  
Ka be ke kgathetse kgathalang  
Mmele o baba ke mahlaba  
Mme o labalabela dikobo  
Ho isa masopo ho beng  
Ho re le bona ba tle ba kgotsafale

E itse ke sa kena dikobong feela  
Ka bo re hlwi, mme ka kgaleha  
Kgaleho ya ba robetseng boroko  
Ba seng ba tlohile ho lena lefatshe  
Bo orohela hae badimong

Ke ya ho tshaba ho ba motseng!  
Ho ba nka be ke betsehile le masiu  
Ka qela ho leeto ho leba lapeng  
Moo kgotso ke tla e bonang teng  
Ho re ke bohlothe le nna  
Jwalo ka batho bohle

Ya ka le ya tseba hore nna ke moeti  
Mme le lokela ke ho ikgodisa ke hona  
Ka ana madi a mora motho  
Hore ke tsohe ke le mehwabadi  
E ka be letse ke harolwa ke dibata

Tsa moo ditshitshidi ke tse sehlooho ha ka kang?  
A moo matsetse e kgetholla ho le ho kae?  
Ka ha beng ba lelapa ba robetse boroko  
Ha nna nthwana batho ke hlobaela  
Fifing le lekale, mokgathaleng o mokale  
Ha ke itlhokela phomolo feela  
Hore tsena dibupuwa di kgaohane le nna  
Ke tle ke robale boroko

## Monya Matsete

---

Na e ba boo bosiu bo tla sa neng?  
Ke tle ke lokolohe maqakabetsing a na  
Ke tle tshole tlhako morong  
Ke lebe haeso  
Moo kgomo di tlwaetseng makgulo  
Mme ke tle tsebe ho natefelwa ke boroko  
Ka ha bona ke sera  
Mme bo lefuwa ka mehla

### 27. E ne Re!

Ao! Ao! mahlo ke diala ha a je sa motho  
Ho thwe fepa mahlo, ka ha a kgothole letho  
Ntle le botle bo bonwang ke leihlo  
Lona le tsebise kelello  
Eo yona e sebelang pelo  
Pelo e dubane le maikutlo ka e na taba  
Taba ya hao nnake  
Wena pabala ngwana e motle  
Marama a hao ke dipotokwe tse ntle sa ho metwa  
Ke o mete ka makgethe hore o swabe  
Ke o qhibidihise pelo kgarebe  
E ya bo, ke o bakele motswebere maikutlong  
E le moo ho fetileng e na kgalala

Nna mora wa mme le ntate  
Ke re e ne re nnake  
Ke hopola mohla monene  
Mohla re neng re qala ho bonana  
Ka kgahlwa ke setshwana se wena  
Ha wena o ile wa nnyemotsa feela  
E ka ha o mpone le ho mpona  
Nna ke ntsho maketola  
Ke tsamaya ke ketola methepa e kang wena  
Bana ba batle makako  
E le moo ho fetileng nna enwa  
Wa tla wa ntshuisa lerapo la puleng ngwanana  
Wa ntloedisa kgathi sa papadi ya bana  
Ka ba ka batla ke fellwa ke tshepo  
Ka nnete e na taba ke ya e paka  
Hore botle bona bo ya tswallwa  
Ha o motle thope o seilatsatsi  
Botle ba hao e ka toro ho nna  
Le jwale ha ke dumele hore o feela o le wa ka  
Wena moratuwa wa pelo le moya  
E itse ba etjho bo  
Ba re mamello e tswala katleho  
Kajeno lena ke badisa ka kopano ya rona  
Sa tshomo e phethelwa bana ba masea

## Monya Matsete

---

E qalwa ka hore “e ne re”

Yona polelo e kgutlisang mehopolo ya maoba le maobane

## 28. Boqapi

Boinotshing ba ka  
Mehopolong ya ka  
Maikutlong a ka  
Methapong kutlo ya ka  
Tlase tlase pelong ya ka

Ke tlelwa ke mehopolo  
Mehopolo ka ho fapana  
Kgopolo tsa mefutafuta  
Ke bile ke sitwa ho lekanya  
O na mohlodi wa boqapi

Mehopolo yohle  
Le dikgopolo tsohle  
Di ntsosa morolo  
Ho re nna ke ithoke  
Ke boledise ka baheso  
Ke phafe ka bahale  
Ke roke sesotho le basotho

Ruri bona bokgeleke ke ya bo tshaba  
Ka nnete bokgeleke bo ya tswallwa  
Mme nna ke kgeleke seroki  
Moroka dintle tsa lefatshe  
Moananeli wa makgabane  
Seroki, moqapi sebini

Seroki seroka ditaba  
Moqapi mophuthulli wa maikutlo  
Sebini ka lehlaso, dijo tsa ditsebe  
Ka tla ka putswa ka bona boqapi  
Ka bona bokgeleke  
Ke leboha modimo le badimo  
Ka ena mpho, ka neo  
Boqapi dijo tsa moya

## 29. Hoja

Hoja ke le nonyana  
Ke fofele hodimo sepakapakeng  
Ke bonele tsohle tlase tlase  
Mme ke bonele holehole  
Ka tadimo e tjhatsi ba Phakwe

Hoja ke moya setsokotsane  
Ke tsokotse mme ke thunthetse  
Ke tsotwe ke bana ba masea ka mehla  
Setsokotsane lekoduotswane  
Sefefo sa nakwana  
Masenya a tsheha

Hoja ke kokobele  
Ke fofele tlase tlase  
Ha bana ba bapala makolla  
Ba kola dikokobele  
Nna tshupa nako ya ho feta ha pula

Hoja ke maru senesa pula  
Ke phuthehe sa Ntsu e hlwentse  
Sesupo sa bohale ba lehodimo  
Ha le halefile mme le kgantsha matla  
Mmane le o hlatsa kgafetsa  
Sefako ho na sa dinaka

Hoja ke metsi mokedikedi  
Ke tsholohe sa marothodi a pula hlabula  
Mohla pula tsa ditlwebelele  
Ke phalle le lefatshe  
Ho leba moo lena lefatshe le nkisang teng  
Mme ke tseba hore ya ka pheletso  
Ke lewatle bodiba boholo

Hoja ke lerato maikutlo  
Ke iketsetsa boithatelo pelong tsa bana ba batho  
Ke ipeha mme ke itlose  
Ke ruta batho botle ba moya  
Ha moya o ameha ka mabaka a siyo  
Mme o hapa kelello le mehopolo  
Mmele pelo le moya  
Ka ha lerato le itaola

## Monya Matsete

---

Hoja ke ngwedi lebone la lefifi  
Nna ya kgantshetshang ba phirimelletseng  
Le bona baqhekanyetsi  
Dikgukguni tsa bosiu dikebekwa  
Ngwedi leihlo le pataolo mokgubu wa lehodimo

Hoja ke letsatsi lesedi  
Kganare ya mollo, sebaole  
Kganya ya letsatsi lebone leholo  
Mahlasedi a letsatsi kgauta  
Botle bo bokalo ba letsatsi

Hoja ke bophelo  
Bona bona bo makukuno  
Ke tle ke poqise batho  
Ke ba ise tlase le hodimo  
Ka ha bophelo bo matono mapesa  
Mme bo hloka mamello

Hoja dikatso tsa motho  
Di mamelwa mme di arabelwa  
Bona bophelo bo ka be bo le manolo  
Mme bohle ba sitwa ho ananela  
Bohlokwa ba tseo mmopi a re fileng tsona  
Le nakwana eo re e adimilweng  
Ho phela bona bophelo  
Le dikakata tsa teng

### 30. Banana ba Ditoropong

Ba tenne masaka  
Ba apere mponeleng  
Maotong mona ba hula maseka  
Ha thekeng ba itlamme ka lelapi  
Mehlolo ya mona ditoropong

Motho ha a tsamaya e ka re o tlangwe  
O hulana ha bohloko  
E ka re eta tsena di mo tlišetsa maqakabetsi  
Motho o hulana sa seqhwala  
Moo a latelletseng matshwao teng

Ka tloha haeso mahaeng  
Ka fihla ditoropong mme ka bona mehlolo  
Ka bona manyala le maswabisa dihlolong  
Tsena tsohle di etswa ka lerato  
Mme di etswa pontsheng hore bohle ba bone

Na keng ka bana ba matsatsing ana?  
Bana ba barwetsana ba theohile seriti  
Mme ba felletswe ke mekgwa le tlhompho  
Baholo ba bona ha ba sa ba bona  
Ba hlapaola mang le mang ka lerato  
Ya ka bobbe ke tlotleho ho bona

Ba theosa ba nyolosa le makeishini  
Ba beile dikgoropo ka ntle  
Dibono tsona ha ke sa bua  
Batho ba bo ntate maswabisa dihlolong  
Ba bile ba tshaba le ho sheba bana ba rona  
Ka ha ba bontshwa dikakata ka mehla  
Ke dikgarebe tse beileng dibono powaneng

Bang ba re ke mebele ya bona  
Mme e ka kgona ba etse borata ka yona  
Bang ba re o se shebe ha o kgoboelwa  
Ka ha o sa hapellwa ho ba sheba  
Empa e na taba e ya swabisa  
Ka bana ba rona ba banana

O ba bone ha ba palama tekisi  
Motho ha a inama feela

## Monya Matsete

---

E ba diphasele tsohle di lepalapaleng  
Ke ha motho iponele  
Fepa mahlo ka ha ona ke diala ha a je sa motho

Motho wa teng le kgale ho swaba  
O le sheba e ka le mo tlwaela hampe  
Ke tokelo ya hae ho pepesa ditono  
Ho pepesa kgoropo pontsheng  
Ha ke sa bua ka mpho ya badimo!  
Ka ha le yona e pepesuwa lefela  
E ka ke ntho eo batho lokelang ho e bona

Jo nna bana ba intsha seriti wee!  
Ba tla ba itlontlolla hoja mosadi e le modimo wa basotho  
Ba nyefola tlotla le tlhompho e fuwang motho wa mosadi  
Ba beya lefela batho bohle  
Ka ho se hlomphe setjhaba  
Le hona ho hlompha dipha tsa mmele

Na banna ba tla le hlompha jwang  
Ha le bea lepalapaleng ditho tsa lona?  
Diphasele tse nang le beng  
Ha le dula le tonosetsa e moholo le e monyane ka ho tswhana  
Ha batho ba le tseba se ka ba itseba  
E ba le tletleba ka nyenyefatso

Ho mme lona le inyeneyefaditse  
Le itlontlollotse banana  
La ba la qeta tlhompho yohle  
Eo batho ba nang le yona ho lona  
Ka mekgwa le maitshwaro a lona  
Mekgwa ya lona e nyontshang  
Maitshwaro a lona a hlephileng  
Le sitwa ke ho hlompha batho  
Empa le lebeletse ho hlomphuwa  
Le lebetse hore sesotho se re  
Motho se nna o ipolela,  
O motle ha o bolediswa ke ba bang.

## 31. Ba Nkokona Basetsana

Ka ingola meno  
Ka fana ka lerato ka iphoqa  
Ka ba nna ka swaba  
Hore hoja motho ke mo kene ke eng

Na ke eng se ratwang ke banana ba mehleng e?  
Ke menate ke monyaka  
Ba bona mejo ho feta botho ba motho  
Ba kgahlwa ke matlotlo le manobonobo  
Dimomonane le mamphemphe  
Monga a tsona yena ha ba mmone

O tela o telle sa ruri  
O sale o ponne sa poone e kgaoleditswe ke serame  
Ke maqiti le masene a tsena dithena  
Ka moo ho ratuwang bo ratedu ka teng  
Ha feela wa mphato a hafa ka nkatana  
Ke kgotso mokana ka, makgomo a buletswe  
Ke makgulo ho ya fudiswa

Ba tla ba mphophota bana ba ditjhaba  
Ba sala ke swabile  
Ho setse maswabi le masisapelo  
A ho phoqeha ka mehla  
Ho tsena dithena tsa mehleng ena  
Tse kgahlwang ke mejo ho feta botho

### 32. Ke Fellwa Ke Mamello

Sesotho se re mamello e tswala katleho  
Mme e ka kgona motho a be le mamello  
Nthong tsohle, ditsietsing le masisitshong  
Ke re le mohla e kang o furaletswe ke badimo  
E ka kgona o tiisetse!

Empa nna ke kgathetse ke ho mamella  
Ho neng ke thotse  
Ke beile pelo sekotlolong  
Mme ke ntse ke re ho tla loka  
Empa nna ntho ha ntokele  
Di mpa di senyeha ho ya pele

Na ke tla mamella ho fihlela neng?  
Na ha se sesotho se reng:  
Tieho e tswala tahleho?  
Etswe kwekwe ya morao e tloha le sepolo?

Morena shwa!  
Ke re ho senyehe moo ho senyehang  
Ya ka mamello e fedile  
Ke bile ha ke natse letho  
Ke lekehile tumelo  
Akga, nxa man!

### 33. Ke Llela Kgwetsa

Re beilwe mona lefatsheng  
Ho phetha merero ya mmopi  
Yena feela ya tsebang maphelo a rona  
Yena moreri wa tsohle lefatsheng  
Fatsheng le na la ba utlwang

Ka putswa ka lefa letlotlo  
Lefa moetlo wa Sesotho  
Moetlo wa Sesotho lesedi la setjhaba  
Letlotlo leso bokgabane  
Kgapukgapu ya dintle tsa baholo ba ka  
Puo le bonono ba ngwana mosotho

Ka fuwa mpho ka fuwa neo  
Ka fuwa bokgeleke mpho ya mosotho  
Monate wa lehano la monna mosotho  
Ha a bolela ditaba, makumane  
A re mantswe qa qa!  
A lotomanya dintlha mme a qhekella thope  
Eo montsana a qetelle a ngola ka leoto fatshe  
Ke bokgeleke ba monna mosotho

Ka fuwa neo bothotokisi  
Bokgoni ba ngwana mosotho a inotshi  
A iphafa a bolela diboko  
A boledisa baholo ba hae le meloko  
Hore le yena o tswetswe ke batho  
Bahale le dikwankwetla tsa boholo

Utlwa ha seroki se hlabane mokgosi  
Ha ntjhanyana a ithoka a etsa mohlolo  
Sa lekolwane le ithoka  
Mohla bashemane ba tswang mophatong  
E le menyakwe ho hobelwa  
Ho utlwahala medidietsane motseng  
E le mora mannye ka thoko

Kgabareng ha utlwahala modidietsane  
E le lekako le Dibakiso moradi wa Sekwele  
Kgarebe ya seithati moikgohomosi  
A phekola pina mohla mokete wa diteboho  
Ngwana a keta a kgiba

## Monya Matsete

---

A etsa menyakwe ntho tse ntle tsa basotho  
A thenthetsa a bile a thetha  
A kgaba ka makgabane a botjhaba ba hae

Nka bua ke reng ka makejakejane a motseng  
Thena di haketse di kalla ka molamu  
Ka mona ke kotjane molangwana wa madingwana  
Di hlokofetse di hlokofaditswe ke pina  
Pina ya mohobelo ditsamaya naha  
Morethetho pelong ya mosotho nyakallo

Nna ke llela lefa la ka moetlo  
Ke llela lefa la ka puo ya sesotho  
Mekgwa le ditlwaelo tsa sena setjhaba  
Ka ha leo ke lefa la baholo ba ka  
Ba le sietsweng ke botedu putswa  
Le bo hlooho putswa ka ho tshwana  
Ho re mosotho a tle a phele

Hara mmidimidi o na  
Nna ke motlotlo ka seo ke leng sona  
Ke ipela ka nalane ya ka ya bosotho  
Mme ke bolokile la ka letlotlo  
Leo mme a ntshietseng lona  
Hore moetlo le ditlwaelo  
Ke tsona tse tla mphedisa

### 34. Maswabisa Dihlong

Ke eme ke maketse  
Ke bile ke swabile  
Ke swabile nko ho feta molomo  
Ya ka nkare lefatshe petsoha  
Mme nna ke kene

Na boitshwaro ke ntho e teng  
Na lerato le sa le teng  
Na batho ba sa tshepahala  
Ka nnete ya mmakoma ke re  
Ke swabile nko ho feta molomo

Ka lerato la bohata  
Ka masawana a lena lefatshe  
Moo boqhekanyetsi le bohlabaphiyo  
Di renang ka mehla le matsatsi  
Ho kgotsafatsa pelo tse telele tsa batho

Ka nnete nnete nna ke swabile  
Ha bashanyana ba thabela monate wa nama  
Menyakwe le ho ikgotsofatsa  
Ka menate ya lena lefatshe  
Ho kgotsofatsa ditakatso tsa mmele  
Ba nyahladitse maikarabelo

Ke aparelwa ke maswabi  
Ho bile hore ke nyokgollohe  
Ka banana ba sebedisang mebele ya bona  
Ho fumana le ho kgotsofatsa ditakatso tsa bona  
Moo tjelete le bofebe di renang teng  
Ba lebetse hore mosadi ke tshiya ya setjhaba  
Molebedi le yena mosuwe  
Wa meloko le melokwana

Ka tla ka swaba, ka sarelwa  
Ka a na manyofonyofo a mehla ya ka jeno  
Moo ho sa qellanweng teng  
Batho ba phela sa phoofolo tse hlaha  
Moo bophelo ba motho bo lekangwang le ba kokonyana  
Ka ha bohle ba iketsetsa borata  
Ho se na e moholo le e monyenyanane  
Manyala e le pono tsa mehla

## Monya Matsete

---

Jo nna maswabisa dihlong wee!  
A bana ba rona ba sitwang ke ho itshwara  
Bana ke basadi e sa le masea  
Ba tseba ka bohloko ba tswalo, pelehi  
Empa ba sa nkgalebese ka mora ditsebe  
E le hona ho phaphela dintho  
Le hona ho tanasella bophelo

A ka maswabi a ke ke a lehangwa  
Pelo ya ka e ya sisa ka tsena tsohle  
E rotha madi, e kganathetse mahlwele  
Ho bona manyala fatsheng la bo ntata rona moholo  
Ka ha bana ba lebetse hore tsohle di na le moputso  
Mme moputso wa sebe wona ke lefu  
Ka ha ke mona ba shwa la rita  
Sa dintsintsi di bolawa ke serame  
Ka bona boitshwaro le boikakesi

Ruri ke hlajwa ke dihlong  
Ke swabile nko feta molomo  
Mahlo a ka ha a dumele seo a se bonang  
Fatsheng le na la Rantsho  
Ka bana ba rohakang batswadi  
Ha bana ba hlapaola ba bile ba re tlontlolla  
Ka ha bona ke bo tsebanyane  
Bo tlhalentlhajana bana ba mahana jwetswa

Ruri a ka maswabi a ke ke a lehangwa  
Ke swabile hoo ke sitwang ho hlalosa  
Ke bile ke swabela bana ba rona separete  
Ka ha ketso tsa bona di sa ba swabise  
Di swabisa rona ba feti ka tsela  
Di bile di swabisa maqheku a rona  
Bo tedu putswa le bona bo hlooho putswa  
Bohle ba aparetswe ke maswabisa dihlong

## 35. Tshehlana Eo

O mmala o kgunong  
O mosehlana, sa barwa ba Kapa  
E ya bo, ke seilatsatsi wa tshomong  
Ngwana ya hlapang ka lebese  
Eo e reng ha a hlaha, letsatsi le tutubale

O ya kganya, mme o kgantshetsa maikutlo a me  
Ke thope ya ho rateha, moratuwa  
Ngwana ya pelo nolo  
Setsoha le pelo ya maobane  
Ka nnete ruri enwa ngwana  
O jewa pelo

Ke mmabotle, o dikoti marameng  
Pososelo eo botle, kgele banna  
Ya motle motho!  
Ao, sa tla sa ba setle setsheho sa hao  
Wena kgarebe hara makgarebe  
Wena feela o tlisang pososelo fahlehong sa ka

Jo seemo se setle tje ke sebonne kae?  
Ya seemo ngwana, Kgahliso  
O feela o kgahleha ka nnete  
Botle ba ditshomong  
Bona botle bo hlokang sekodi  
Ya motle motho!

Botle ba motho  
Bo bolediswa ke motho  
Mme nna ke mohlankana  
Ya tsotang le ho boledisa  
Ka bona ba hao botle  
Ruri o motle ngwana towe  
Ya motle motho

### 36. Mphempe e ya Lapisa

Fatsheng lena la mahlonoko  
Moo phehisano e leng moqhaka  
Teng moo batho ba tsekisanang ka mehla  
Ba hulana ba bile ba sututsa  
Ba kgantsha matla e le bonkwapo

Dintweng le diqhafutsong tsa ka mehla  
Ha e ka naledi e apohetswe ke kgwedi  
Motho e ka kgona a tiise  
A ikgwantlille a tiye mmoko  
Ka ha phokojwe ho phela e diretse

Mphempe e ya lapisa  
Motho o kgonwa ke sa hae  
Na wena o dutse o qhwaollotse o tshepile eng  
Mathateng le maimeng a lefatshe  
O ka itshwarela le wena wa kgatha tema  
E le hore le wena kgora le nala o tle o di bone  
O di latswe sa lero la manepe le qhibiha tsatsing le tjhesang  
Didutlisa mathe, dimomonane

Kgothala ngwana nnyeo  
O tiise meqheleba, o tsitlalle  
O sebeletse bokamoso  
O se tshepele nthong tsa batho  
Ka ha ho thwe:  
Mphempe e ya lapisa

### 37. Sebueng

Na o a se tseba sebueng?  
Hahle, tshela e bolelwang  
Ke re motho ya sa fellweng  
Ya di shwashwathang ka mehla  
Nyene le bosiu

Mosotho o re bitso lebe ke seromo  
Athe le letle lona ke thoriso  
Jwale Pinky yona ha ke tsebe hore e bolelang  
Ka ha ke hloka moelelo wa lena lebitso  
He! Ba ya bua bao batho

Ke dikgeleke tsa tswalo  
Ke ona mahehle, ba tshohli ba ditaba  
Sa baqolotsi ba ditaba ba phatlalletse  
Ba fuputsa ba bile ba batlisa  
Hore na tse ntjha ke dife ditaba

Ke mpa ke kgotsa ke bile ke makala  
Pinky kgaitsemi, Pinky rakgadi  
Ho bile ho Pinky moratuwa hara bona!  
Na lena lebitso ke la dikgalala na?  
Ditjhibolo tsa basetsana, dibabole  
Bapepeti dibuela mofela

## 38. Sekgopi

Ka tla ka kgopiseha  
Ka ho botsakwa dipotso di hana ho fela  
Ke botswa pasa le sepeshele  
Ke dubiswa thankga sa kgalabolokwe  
Yona e qhobang potokwe e sa kgaotse

Ka eta ka nka leeto  
Ka fihla motse moholo wa naha eso  
Teng sephethephetheng, mmidimiding  
Ke lebiswa tlase le hodimo  
Ka batluwa seitsebiswa pasa  
Ya ka ha ke naheng ya baholo ba ka  
Nna tlohlo sa Rantsho

Ka leba makgoweng ho batla tjako  
Teng moo moroho o batlelwang  
Ka ke utlwetse ka sekgeo, ho kgatha thite  
Mme bao ba netefatsa eo taba  
Ka ntsha mangolo ka bontsha bokgoni  
Bohle ba kgodiseha ke enwa motho  
Ka mpa ka sitwa ho riwa  
Ka ha nna ke hloka lebitso la mzabalazo  
Ke bile ke sa tsejwe ke bao ba ditulong  
Nna ntshonyana ya batho

Kgabareng ka tshwarwa ke tlala  
Lephako lona le senang molato  
Le nkakata le hloka ho lefuwa  
Ka kena lebenkeleng ho thola ditheohelang  
Ho ngwana qoqotho le ho thapisa mmetso  
Mme bao batho ba nnyemotsa sa setlaela  
Ka kgesuwa sa motho wa lepera  
Ya ka ya ka tjelete e nkgela batho  
Bao baikgohomosi ba kgethollang

Ka tswa ke maketse ke bile ke le bohloko  
Pelo e le mahlwele e le kgubedu  
Ke e na tshwaro ya ntshonyana nna ka sebele  
Ke kgobohetswe ke bile ke bela  
Ke le mabifi ke halefile  
Ke ikutlwa ho otlala ntshonyana  
Ke bate motho le sa tshelweng ke nta

## Monya Matsete

---

Hore nna ke mohale haeso  
Ke mohlabani ntwala ke ya e hlanaka  
Le ha mona ke kgeseha ha kana

Ha feta kgarebe morwetsana  
Ngwana ya seemo se tle  
Ya ditho ditho, ya mmele o kgahlehang  
Motho wa ho phallisa madi a mathele hloohong  
Ka ba nna ka timellwa  
Ka lebala ohle mathata a ka  
Ka boha ha ngwale e kgiba  
Ha kgarebe e itsoka letheke  
E kgaba ka botle e qhoshala!

Ka thetha sehohlola ka ba nna ka letsa molodi  
Ka letsa wona wa lehare, molodi wa bahale  
Ka re dumela kgaitsemi dumela thope  
Dumela wena motho wa ho tshwana le seema hale  
Wena o mpa o le motle ho fetisa  
Nfetise tabeng ke ena nana  
Ke kgeswa ke bohle ke nyedisehile  
Ka mpa ka kgahlwa ke tshobotsi ya hao  
Mme ka lebala ka ohle maqakabetsi a me

Motho a ntjheba hang mme a re nxa!  
A mphoqa motho a siya fela leo a le lebitseng!  
A re na ke wa kgoho dife mme ke tswa kae hara lee?  
Ke tsamayang ke phaphela batho ke sa ba tsebe  
Ruri ke hlolletswe ka lena letsatsi  
Mme ke kgopisehile ke hona  
Tsena tsohle ke sekgopi ho nna  
Hore nna ke kgesehe ha kaale  
Sa nyalasi mmutla wa dintjeng.

### 39. Semphu Semphuu Se Nkga Kae

Ka otlwa ke kgopolo monahano  
Lesumatha etswe ke sa robile monakedi  
Ke hlabile kgobe ka lemao  
Sa badisa ba disitse dinku  
Ba le sakana la nkope  
Ba okametse mampodi  
Eo yena a qoqa moqoqo o qoqwang ke bahlankana

Semphu semphu se nkga kae  
Ha e le mona ke fofonela ditaba  
Tsebe di hlohlona di supa ditsehele  
Hore kae kae ho teng ba di fafathang  
Empa nna ke le moetsuwa, mmuwa  
Ba ntsekolla ka mantswe hore ke tswe ke monate

Semphu semphu se nkga kae  
Ka lefotha le monatenate la nama  
Monko o fothaela sebaeng  
Hore mang kapa mang a ikgodise  
Hore ho teng tjetje motseng mona  
Ke re na ke mang ya hlabileng phoofolo  
Re tswe re ilo ja maleu

Semphu semphu se nkga kae  
Ha dinyalasi di hlaba moolo motseng  
Di bidiketsa taba kgolo  
Taba di tsejwa ke bo rare  
Dinyalasi tsona empa e le manqosa  
Barumuwa ba mona ba hlokang leeme  
Ba bua taba tshitja, puo phara  
Ka ha Sesotho se hloka patuwe

Semphu semphu se nkga kae  
Ha e le mona ke tsitsipana  
Meriri ya ka e phahama mme ke hwama  
Na tsitsipano ya ka e hlola eng kajeno lena  
Na ke koduwa kapa tsietsi efe  
E tlang ho ntlahela hara lena

## Monya Matsete

---

Nna hase nthwana batho

Semphu semphu se nkgae

Boo ke boipiletso ba ngwana Mosotho

E le ha a lopa diketsahalo

A manolla le hona ho qhaqholla ditlang

Ka ha rona mehlolo re ya e nena

Re bile re nyonya ketso lesumatha

### 40. Heu Helele!!!

Heu helele, mehahlaula dithota,  
Poropotlwana tsa Basotho,  
Tshehlana tsa Basaia,  
Dinaledi dibonwang.  
Palesa sehohela dinotshi.  
Marothodi a pula Hlabula,  
Pula sethapisa naha.  
Pula mohlodi wa kgora.

Namane tse tshehla, dibata.  
Madinyane thari ya sebata.  
Setswala ngwana ke setswala mmae,  
Athe ngwana e motona yena ke thaka ya ntantae.

Melodi e ya kodietsa,  
Lekodiopo le utlwahetse,  
Melodi sa tswere mohlakeng.  
Mathe malodi, dimomonane,  
Sa manepe dijo tsa dikgosi.  
Ya kgaola ya ya!!!

## 41. Lona Banana ba Basotho

Ntumelleng nna ke ithoke  
Ke roke sebupuwa se motho  
Sepubuwa sa Mmopi, tlhalentlhajana  
Motho hara batho  
Senakangwedi, naledi ya meso

Ka tswalwa ke motho, mothohadi  
E seng se ka motho be bolelwang  
Morwetsana wa Bataung, marena  
Motau selo sa borena  
Motau moholo tshwao la borena

Hela ntloheleng bo ke hweletse, ke itlatlarietse  
Ke hwehle, ke qhelake ke be nne ke thentetse  
Ke qetelle ka ho keketlisa dikeledi, meokgo  
Meokgo ya tlhomoho, pelo hloko  
Dikgapha keketle, rotho rotho  
Menyepetsi tsholoha, nyepeletsi

Ke amehile ke kgarejana tsa haeso  
Pelo ya me e thulamme thulama  
Moya wa ka ke mosollane, sesolla naha  
Mehopolo ya ka e farasitse farasa  
Mahlo a me wona a tsotile setsoto  
Mme kelello ya ka yona e kgodisehile

Bana ba batho ka seemo botle!  
Tlhafu di setlalletse sa poho ya lekuka  
Menoto e benya benyang, phatsimo ya mohlolo  
Fuba se tswile sa peta tsa leeba  
Matswele ke disatalla, masupa tsela  
Tswele la ngwana mosotho, sebua ditaba  
Moeka o mokgutshwenyane, sa thokolosi ya motebong  
Ditshika tsa thope ya mosotho ho kgahleha  
Ruri bona botle bo tsosa molota

Ke mang ya ka phehang le kgarejana tsa basotho  
Bana futswetseng ka lebese ba qoulellwa ka motoho  
Tawana tse tshohadi, lerato senyekgenyekge  
Seithati seikgohomosi, mosadi sebele  
Tswere ka ntswe le phefa phefa  
Sephokoi sa lehlaso, dijo tsa ditsebe

## Monya Matsete

---

Botjhatsi ba kelello ya kgarebe ho rateha  
Mahlo a boleya sa mohodi o kakatleya le molatswana  
Diako tsa ao mahlo, moqhekanyetsi.  
Mahlo a ho thetsa banna ka bo Sekgwahla  
Banna ba hlapanye mme ba ikane  
Hore la bona lerato ke la molebe  
Hore e na tshehlana e ba hapile maikutlo

Banna ba fetohile matjhepa  
Ba lebetse ka malapa a bona  
Mosadi le bana ba tla sala ba leletse  
Ba lebelletse monga motse ho kgutla  
Athe yena o ekuwe koo a ileng  
O hapilwe ke fiso la metseng  
Ngwana mosotho ho rateha

Mamela molodi wa lentswe la hae ha a bua  
Lebonyo la hae lona le roba ditho  
Letsheho la hae ho kgahleha  
Meokgo keketle ha thope e tsheha  
Kgapha tsa thabo le monyaka  
Sesupo sa kgotso e renang pelong ya thope  
Kgotso ya mosotho seka maloba  
Ha Moshoeshe a ne a re:  
Kgotso e rene tjhabeng sa Rantsho

Jo mofuthu wa lerato la heso Maluti  
Moo lerato le fanwang feela  
Ntle le mahenehene a sejwalejwale  
Ruri ke ntho e tsotegang  
Lerato la ngwana mosotho sejthabeng  
Lerato la thope ho mohlankana  
Ka ha mosadi ke tshiya ya lelapa

Ke re le bue le kgutla  
Ka tsena dithena tsa Basotho  
Bana ba ho rateha, diponono  
Bana ba seriti, basadi ba kamoso  
Ngwana mosotho tlhompho pele  
Boikokobetso sa mathe le leleme  
Ke bona botle ba tjhaba seso

## 42. Mara Nna Ke Mang He?

E re ke o qhetsolele  
Ke be ke o amele taba ke ena  
Kibiditla ya taba, mosimahadi wa qaka  
Ntho e nkokona le tjabang le le dikelang  
Empa ke ingwaya hlooho motjhele  
Ke hloka ya ka nkarabang

Hela ke re ntumelleng bo!  
Ke le kumele sengwatho  
Taba tjitja, bo hlooho putswa ba kae  
Ka ha ena taba e hloka bona ka sego  
Ba tle ba mmanollele yona ba qaqise  
Ke tle ke tsebe ho ba le kgotsofalo le nna

Ruri ena taba e opisa hlooho  
Ke emme le monna mateneng ke hona  
Sa monna motsamai a tlaletswe ke naha  
Empa nna ke batla mme ke batlisisa  
Ka nalane ya ka, motso wa me  
Kgwetsa lenaka la ngwana Mosotho

Mme ke Mosotho wa sebele  
Ke Motaung wa ha Thulo  
Lekolokotwane la Mokabasia  
Ngwana Mamosolodi le Mokgele  
Moana sebata se maro morena wa dibata

Nna Sesotho ke se antse letsweleng  
Ka nto futswela ka sona ka etsa mofutswelo  
Ka bekwa mme ka betlwa  
Ke tsona dikgalala le dikakapa  
Ho ntsha o motle mosebetsi  
Mosebetsi wa motsoho, ntho ya ho tsotwa  
Kgeleke ya mohlankana, molomo monate

Ntate ke Letebele la Qhotseng  
Ke lona leHlubi sebele, Mkwayi  
Ngwana madi a borena, kgosi  
Motlotsuwa le mokgethwa wa badimo  
Tshawe yena Khawuta  
Mojalefa, ngwana ntlo kgolo

## Monya Matsete

---

Leleme le paqame, le mathe malodi  
Le peteketsa puo ya Setebele sona Seqhotsa ba se tjhong  
Puo ya bahlalefi makako  
Puo ya bo Mandela ka bo Mbeki  
Motho kgaba ka sehaheno, o phatsime  
Ke yena Mothethwa eo ka seqo

Ka nqe ngwe ke kgabile ka bokgeleke  
Bokgabane le botle ba Mosotho le Bosotho ba hae  
Ha a kgaruma a bile a kgehlepa  
Ka malahlelwa le ka ona maele  
Dikapolelo le tsona dilotho kaofela  
Ntjhanyana e butswitse ke masutsa  
Pitsa di tshotse dihlabosang ka enwa motho  
Ka ha Sesotho sena o se manolla a se tsenkolle  
Ka makgethe le bona bokgabane

Hantlentle na nna ke mang?  
A na ke Letebele kapa Mosotho?  
Na ha ke ipolela ke lokela ho reng?  
Nna mora Makwayi tloholo sa Bataung

Nna ke hodisitswe hara tjhaba sa Moshoeshoe  
Mane motseng wa Bolata pela Tseki  
Qwaqwa thaba di mahlwa  
Moo teng ke kgabileng ka Sesotho le Bosotho  
Ka rweswa moqhaka wa tlholo  
Ka Sesotho le makgabane a sona

Jwale ha ke bue ke ya thatoloha  
Sa toloki e haretse lodi  
Bokgeleke bona ke bo tswaletswa  
Sa seroki mmoledi wa ditaba  
Empa nna ke bohla Sesotho ke bohla puo  
Ke nya matsete sa mosadi ya bohata  
Ke mpa ke kgaba ka bokgabane le bokgalala

Tjhe ona morwalo o boima o a ntshita  
Ka ho bitswa Letebele empa ke sa tsebe letho ka Setebele  
Ka nnete hona ke ho tswariswa phuphe ka lefe!  
Yona Phokojwe tlong la Nku  
Ka ha nna ke leHlubi ka lebitso feela  
E seng ka diketso le dipolelo

## Monya Matsete

---

Jo bohloko ba ho se itsebe we!  
Bo tebile le ho feta kweetsa bodiba  
Bodiba botala mokaketsi  
Sa lena lebitso la ka  
Ka ha le ntshupa Qhotseng ha Hlubi  
Empa nna ke itswela thaba di mahlwa  
Fatsheng la Basotho

### 43. Lefu Lehlo Ke Ditsheho

Lefu leholo ke ditsheho  
Leo ke leele la Sesotho  
Eo ke tayo ya Mosotho ho tloholwana sa hae  
Hore mang le mang a itsebele  
A be nne a une molemo  
Ka ao mantswe a masene

Baholoholo ba rona ba boletse  
Bontata rona moholo ba tjho  
Ha nto pheta ditshohatsana tsa rona maqheku  
Yona Medimo ya rona ka seqo  
Ba re ha ho setlhare se fetang setsheho  
Fatsheng lena la ba utlwang

Keketeha motho, o sene o be nne o betle meno  
Ka ha baholo ba rona ba boletse  
Ba re re tshehe hore ditlena di be nne di ope  
Ka ha lefu leholo ke ditsheho

Maoba mona mohla mokete  
Ka lenyalo la mora Mokebe  
Re be re iqabotse  
Re tsheha hore kgopo di ope  
E le ha tlhare e lelekisa tsebe  
Re keteka re natefetswe

Maobane a na a matsho  
Re ne re llela Nkgono Modiehi  
Setsohatsana sa Modimo ka ho loka  
Qheku la batho le re siileng ka tshohanyetso  
La re thobela mme la orohela Badimong  
Ra sala re itshwere o ka tlase molomo  
Re kgotsa re bile re dumaela  
Ka ho tsamaya ha hlooho putswa

Ho na teng lefung la hae Nkgono  
Re ne tsheha re keketeha  
Re hopola makgabane le dintle  
Tsa lena leqheku la ha Rantsho  
Ka ha le mahlonokong re fumana kgotso  
Ha re tsheha re bile re bonya  
Ka ha setsheho ke pitsa ya mahloko ohle

## 44. Mankokosane

Mankokosane, pula e ya na  
Re tla hola neng  
Ha o se o sele  
Dikokobele di fofa fofa  
Makabelane a sasanka sebakeng  
Mmokodi o imanehile lehodimong  
Ha o se o sele  
Ha o se o sele

Puleng e na ya medupi  
Ha e tsholoha sa diphororo  
E fafatsa sa mafafatsane  
Bana ba masea difahleho di edile  
Diporopotlwana di thabetse marothodi  
Metsi a lehodimo, pula

Setsheho e le sa mohlolo  
Ba keketeha mme ba tabana  
Dibobothwana di nkehile e le ka nnete  
Di fopha metsi di kolobile  
Di bapala modikwane  
Papadi ya bana

Lefafatsane, phororo  
Mofani wa bophelo  
Monko wa pula mobung o leswe  
Ho hlasimoloha ha mmele metsing a batang  
Metsi a maphodi metsi a pula  
Ho tsepama ha kelello matlopotlopong  
Na re tla hola neng  
Ha o se o sele

Bontjhanyana mabaleng ba ya thalatsa  
Ho tswile ke re le tsona ditsohatsana  
Maqheku ho hlasimolla mebele  
Hore manonyeletso a otlollohe  
Ditho di twatwatletse  
Masapo a qhomaqhome  
Na re tla hola neng  
Ha o se o sele  
Ha o se o sele

## Monya Matsete

---

Thellisane ya bashanyana mabaleng a motse  
Ba ya qila ba bile ba ya qiletsa  
Thena di ya itshilafatsa  
Seretseng qhafutsong ya lefatshe  
Kamano ya motho le lefatsane  
Na rona re tla hola neng  
Ha o se o sele

Mankokosane papadi ya bana  
Papadi ya banana le bashemane  
Papadi ya lerato, ya thabo  
Masea hobaelang metsing  
Tlapuretsang mme le qhafuleng  
Qhafutsong ya pula ya medupi mahlohonolo

Mankokosane pula e ya na  
Na re tla hola neng  
Ha o se o sele

Modikadikwe lefu la matahwa  
Modikadikwe lefu la ho wa  
Botahwa batho ba tahlwe  
Ba tahlwe ke marothodi a pula  
Pula mohlodi wa bophelo  
Pula monyakwe wa lefatshe

Mankokosane ka modikadikwe  
Pula e ya na  
Na re tla hola neng  
Ha o se o sele

Bonang monyakwe fahlehong tsa masea  
Fahleho tsa maqheku di edile  
Di paka kgotso le kgotsofalo  
Dinyalasi di bile di tsoka mehatla  
Ho paka e na kgotso  
Utlwang makgomo a mmuetsa  
Diesele ka ho hihitsa  
Modidietsane wa dipitsi o aparela motse

Monko wa mobu o leswe sekapakeng  
O ka utlwa ka bo tswere mohlakeng  
Dinonyana ho ananela e na pula  
Di tswiritsa di bile di phaeya

## Monya Matsete

---

Mapheo di a phuphutla  
Utlwa eo melodi ya diphoofolo tsa naha

Mankokosane pula e ya na  
Na re tla hola neng  
Ha o se o sele  
Ha o se o sele

## 45. Maru ao a Maputswa

A ke le boneng botle bo bokalo  
Botle bo bonwang ke ana a ka mahlo  
Botle bo hlokang ho hlaloswa  
Ruri mantswe a ke ke  
A hlolosa bona botle

Le ha lehodimo le hlwentse  
Le re tsholela mohatsela le serame  
Serame sa mariha kgwedding ya Phupjane  
Le itokisetsa ho nesa lehlwa  
Kapoko ba e bolelang ka Sesotho  
Yona kobo tshweu seaparo sa naha

Na nka sitwa jwang ho ananela  
Ho tsota le hona ho kgahlwa  
Ke maru a maputswa putswa  
A anehilwe lehodimong le batalletseng  
Mme dithaba tsa heso di le bophahamo ba ho fihla lehodimong  
Di fihla hodimo hodimo marung

A ke le boneng hleng bathong  
Maru a ikgarile sa sefefe sa Kganyapa  
A ikahile botle bo hlolang  
Ke dikgare sa meriri ya baetsana  
Mohla ho neng ho tjhata Ntswaki  
Meriri e lohilwe dikgare  
Botle ba banana ba Basotho bo!

Ke bona boputswa ba molora  
Mmala o motle tle  
Boputswa bo kganyang  
Boputswa bo fifetseng  
Jo nna botle ba lehodimo wee!  
E ka mahlo a ka a hlolletswe

Tswelang ntle kaofela ha lona  
Le lelatse mahlo a lona lehodimong  
Le boheng botle ba naha ya heso  
Mohla maru a pula a kwahetseng  
A ipokahantse ngatana ngwe  
A bidietsa ntho e se ka ka letho  
Empa re tseba ka botlalo

## Monya Matsete

---

Hore maru a pula a re tlišetsa mahlohonolo  
Bophelo bo fumanwang puleng kapa lehlweng  
Tse neswang ke botle bona bo bonwang

## 46. Pitso ya Badimo

Bonyenyaneng ba ka  
Bongwaneng ba ka  
Kgolong ya ka  
Kgodisong ya ka  
Ke le moshemane wa mosotho  
Ngwana wa hlooho ya badimo

Dibokong tsa ka  
Menyepetsing e keleketlang  
Ka mehla le matsatsi  
Ka ha ke hloptjhwa ke toro  
Toro tshosetsi ho nna  
Pitso ya ka badimong

Boinotshing ba ka  
Ha mehopolo e farasa  
Ha pelo e ameha  
Mme moya o thulama  
Mme moya o thulama  
Ke hopola pitso ya ntshonyana  
Pitso ya ka badimong

Na motho a ka baleha  
Pitso ya hae ho lena lefatshe  
Ka ha motho o phela ho lena lefatshe  
Ka thato le tumello ya badimo  
Ho phetha tsa bona ditakatso  
Pitso ya ka badimong

Ka tsometswa ke toro  
Ka phofa dihaeya  
Ya ka nna ha ke moshenyana  
Ngwana ya nkgang lebeso ditsebeng  
Ka ena thomo, toro  
Pitso ya ka badimong

Na badimo beso ba bonne eng  
Ntho e kaale kaale ho nna  
Hore ke kgethelwe ona mosebetsi  
Mosebetsi wa bahale le batlotlehi  
Empa nna ke le leasana poropotlwana  
Ho ena pitso ya badimo

## Monya Matsete

---

Kajeno lena ke hodile  
Ke monna, mohale sebele  
Senatla mohlabani  
Mme ke hopola toro pitso  
Hore le nna ke mokgethwa  
Ngwana hlooho ya badimo  
Pitso ya ka badimong

Thomo ya ka haeso  
Moo ke filweng mpho le bokgoni  
Mpho ya badimo, bongaka  
Mpho ya badimo, pheko  
Pitso ya ka badimong  
Ho ba mohlabani le mohale  
Ho lena lefatshe leo ke beuweng ho lona

Kajeno lena ke ya dumela  
Ke bile ke araba ya ka thomo  
Ho lena lefatshe la ba phelang  
Hore ke tla ba mohlabani mohale  
Pitsong ena ya badimo ba heso  
Hore le nna ke tle ke imolle ditjhaba  
Ke le nkgekge kwakwariri  
Pitsong e na ya badimo

## 47. Molaetsa wa Badimo

Ho itswe ke tle ke le jwetse  
Ke le ame le ke le kumele  
Mme le thehe tsebe  
Ho ena thomo  
Le utlwe ke hona  
Le se ke la utlwella

Nna ke mpa ke le morumuwa  
Morumuwa ya hlohang lonya  
Mmoledi wa ditaba ho tswa ho beng  
Mme nkeke ka loba letho ke hona  
Ka ha morumuwa a lokela ho phetha tayo  
Ho bolela ditaba jwalo ka ha a di bolelletswe

Tsena ditaba di thata  
Di bile di ya sita, di boima  
Ka ha di tla bueha ka ona molomo  
Molomo wa kgeleke, sehlwela  
Hore ba nang le ditsebe ho utlwa  
Ba ikutlwele ka lena letsatsi

Ho itswe ke tle ke le botse  
Ho re ha na ya lona kgwetsa e ho lefe lefatshe?  
Moo e nyametseng monyamella!  
Ha thwe na la lona lefa ke lefe?  
Ha e le moo setjhaba se qhaleha  
Bana ba bile ba lapa, ba lala ka lephako  
Empa ho le teng banna le basadi  
Tjhabeng sena sa basotho

Ho itswe ke tle ke behe pehi ka lena letsatsi  
Ya ho sarehwa ha baholo ba rona  
Ka bo Moshoeshoe ka bo Napo  
Bathehi ba setjhaba sa basotho  
Ho sarehwa ha bona ka tlhoboho ya setjhaba  
Hoo e kang thuto ya ngwana mosotho e moyafetse  
Mme bana baholo ba re ba thohothetswe ke hona  
Ke tloholwana sena sa rantsho  
Se setseng se haketse ho lena lefatshe  
Ka ha se hlobohanne le moetlo  
Sa nena nalane ya sona  
Sa nto kgesa le ho nyefola bafatshe

## Monya Matsete

---

Badimo ba nyediswa ke ya bona tswala  
Tloholo le tloholwana sa motho

Na le tla utlwa mohla ho thweng eng?  
Na mohlolo ke ofe oo le tlang ho kgodiseha ke ona?  
Ka yena koduwa ya mosotho  
Koduwa ya mafu  
Koduwa ya tshotleho  
Koduwa ya bofuma  
Koduwa ya nyediso  
Ya ka mosotho o furalletswe ke badimo  
Ka ena tshita le qaka

Ikutlwele ngwana, le wena e moholo  
Ba llile ba hao badimo  
Ba bile ba o furalla ke hona  
Ke nyediso le kgalefo  
Ka ona mohlolo o bonwang  
Mohlolo wa basotho ho lahla setso sa bona  
Manyala a ho nyediswa ha badimo sebele  
Koduwa ya tahleho ya puo le thoko

Ya nang le ditsebe ho utlwa  
A tle a ikutlwele ka lena letsatsi  
Thomo le molaetsa wa baholo ba rona  
Mesarelo le maswabi a bona  
Ka sena setjhaba sa basotho  
Se ba rohakileng mme sa ba hlapaola  
Hore ka lena letsatsi  
Bohle ba tle ba tsebe  
Hore ntwana e ya lwana  
Mme baheso badimo ba haketse  
Difahleho di inamme  
Di swabisitswe ke tswala ya tsona  
Utlwang thomo ya badimo

## 48. Kwape

Kwape ngwana ngwanana  
Ngwana mosotho o rutuwe molao  
O rutuwe maitshwaro, a rutwa botho  
Mme o tseba ka botlalo ka tlhompho le tlotla  
Tjhabeng sena sa Rantsho  
Mme sena se tsejwa le ke tsipa sehoole

Ngwana mosotho o kgaba ka botle  
O kgaba ka mmele wa hae  
Tshobotsi le seemo ke tsona tse pele  
Tse pakahatsang hore enwa ke kgarebe  
Ke ngwana ya laheileng  
Motho ya fumaneng thuto

Jwale ke maketse ke bile ke maswabi  
Ka ho bontshwa mehlolo  
E ka batho ba ya ntubela nna  
Ba nhlolla mohlolo ke sa o tsebe  
Ke bile ke sa lakatse le ho o tseba  
Ka ha mohlolo o tsietsa

Kwape ngwana ngwanana!  
O ngwana ya jwang ya dulang hampe ha kaale?  
Ya sa itlhompheng, ya sa hlompheng batho ba bang  
O dutse o nyapotse  
O bile o a otsela ke hona  
O ho tshabe ho hloka maitseho!

Kwapetsa wena thena ke wena  
Wa dula sa banna botahweng  
Wa bula dirope wa pepesa diphasela  
Ke re wa re bontsha le tsona ditshinyetso ka sebele  
O tubela eng na ngwana towe!  
O re bontsha mehlolo hara lee!

Ngwana ngwanana ha a dula o ya iphutha  
A bokelle mese a ipope  
A bontshe hore yena o betlehile  
Ka ha motho o mmona ka maitshwaro  
Hore ke sekwahelo sa efe pitsa

## Monya Matsete

---

Tseba ho tloha kajeno lena  
Hore ka mehla ha o utlwa ke hweletsa  
Ke re: kwaaaaapee!  
Ke be ke eletsa wena thope  
Hore o kwalle bana tlung  
Ka ha lemati o lebutse le pekettle  
O nonositse selo koko ya bana

Kwape bo kgaitsemi  
Kwapetsa dirope o pate taba  
Phasela ha e behwe lepalapaleng  
Kuku ke patuwe basothong  
E rolelwa kgaebane, e ya tlotluwa  
Pata mpho ya hao ya badimo nnake  
O se nna o re pepesetsa yona ka mehla

## 49. Lehafi

Mosotho o boletse ha a re:  
Bophelo bona ke lebidi  
Mme moja pele o tshwana le moja morao  
Ka ha bohle re fumana moputso  
Wa diketso tsa rona

Jo nna we monate wa lerato le utsuwang!  
Ha o hlalosehe e bile ke semaka  
Motho o natefelwa sa ngwana lesea  
A ja dipompong bo seqetabeke  
Tswekere e senyekgenyekge  
Hore motho a iteke molomo a sa qete  
A kganathetse mamphephe a dimomonane

Thuto ya lapeng e re mosadi wa motho ha a tanakellwe  
O wa hlomphuwa mme o mo kwekwetle  
Ka ha o se a kgahluwe  
A bile a ikana ka monna wa hae  
Hore ba tla arohangwa ke lefu  
Fatsheng lena la menate le meutlwa

Empa ke re pelo e ja serati bo!  
Ka ha ngwana towe ke o rata rati  
Sa lerato la masawana la bongwana  
Empa rona re tseba ka botlalo ketso ya rona  
La rona lerato le tuka malakabe  
Sa sebolele mollong wa hlaha  
Rato le sefutho ka tsela ya mohlolo

Ka nnete ntho e utsuwang e monate sebele  
Ke fapana hlooho ke wena thope  
Jwalo feela ka ha le wena o shwa o ikepela ka nna  
O re buti ke wa hao motjha-o-tjhele  
Hoja ka kopana le wena pele ke nyalwa  
Nkabe ke sa itlama ka lenyalo  
Lena leo ke furalletseng dikano kajeno lena  
Ka lebaka la lena lerato la ka ho wena buti nyeo

Le nna ke e tjhaella monwana eo taba  
Ke re nkabe ke inketse wena ratu  
Ka o hulela haufi le pelo ya ka  
Wa ba seipone le lebone la ka

## Monya Matsete

---

Mme ka o rvesa moqhaka nnake  
Ke qetelle ke o entse wa ka molebella  
Ho tempella e na taba ya ka le wena nnunu  
Hore e tsejwe ke modimo le badimo

Empa re mpile ra swetswa ke bophelo  
Ra tsebana nako e se e ile  
Sa lefetwa le llela lenyalo  
Sa moshanyana a llela ho disa  
Mme o se nkuwe ke sekgwahlapa seo sa monna  
Ke mpa ke itshedisa ka hore le nna o wa ka  
Le ha la rona lerato e le patuwe  
Ke le lehafi la hao nnake  
Re natefelwa dikgukgung le mafifing  
Moo teng mahlo a sa boneng  
Re nyonyoba sa dikgukguni  
Sa mashodu le tsona dikebekwa  
Hore feela re natefelwe ke lerato

## 50. Lerato la Moya

Ka kopana le motho  
Motho e mokgutshwenyane  
Ngwana ya seemo  
Ngwana ya sootho ka mmala

Jo ngwana mosotho ka bokako!  
O kgantsha bokgeleke boqitolo  
Botjhatsi ba kgarebe ya mosotho  
O bapala boleke mampatile le motsheare  
Tsatsi le emme le le hlooho tsa mengala  
Le tjhesa sa pelo ya buti Feze  
Ka ena thope ya lekako

Ka tla ka rata motho ke sa motsebe  
Ngwana towe o mang wena  
Wena o thefulang maikutlo a ka  
O robang o na moya wa mohlankana  
Nna kgutsana ya batho  
Ke leng mohaung wa hao  
Ho bitswa ratu rato la ka

Ke ya le tshaba lerato la moya!  
Ntho tsa baloi ke tseo di qakile!  
Di ntubisa thankga ka yena tswibila  
Ngwana eo ke mo tsebang fela mohaleng  
Le sefahleho ke e so sebone!

Ha o tshaba o tshabe boloi  
Le bona baloi fela jwalo  
Ka ha le nna ke mona ba ntoile  
Ba ntaka ka methokgo ka tsherehana  
Ka rata motho ke sa motsebe  
Ke mpa ke mo ratiswa ke baloi

Na wena o reng kgaitsedi  
Ka yena taba, kibiditlahadi  
Ya ho kgahlwa o kgahlwa ka moya  
Ka ntho tsa baloi re sa loye rona  
Empa maikutlo o na o a hapile  
O iketse ka wona ngwanana  
Hole hole moo o phelang teng  
Moo e na tlhankana e sa tsebeng le ho tseba

# Monya Matsete

---

Sa moloi a fofa ka ntho tsa hae ka kgitla  
O le tshabe lerato la moya!

## 51. Ke Raha Moritshwana

Nna ke tswetswe ke mme le ntate  
Le ha mme ba ne ba sa mmatle  
Hae boholo, habo ntate  
Ba re ntate o kene kene bana ba Basotho ka eng  
Ha kgarebe di le mantletsetletse Qhotseng!  
Ba re ntate o ya bahlolla na.

Nna ke tswalwa ke bobedi bona  
Ba tlisa poropotlwana e nna lefatsheng  
Ba nteotsa ba nto mpetla  
Ho re ke be monna eo ke leng yena kajeno lena  
Moshemane ya dikoti marameng  
Tshwao la bo mmabotle  
Theba la ho hohela methepa!

Ka hola ka tshwara bothata  
ka kgarebe tse ipherehelang nna  
Di re buti re ya shwa re ya ikepela  
Lerato le ngata mona ho rona  
Lerato la hao feela wena buti nyeo

Ruri ngwana e motona ke kabelwa manong  
Yona nku e sa lleng sa konyana e hlajuwa  
Ka ha ke moo mme moratuwa o ntshiile  
A oro ha ho leba teng boya batho  
Hae badimong ho ba modimo wa ka  
Bao ho bona re reng lesedi, kganya

Lemo di ile ngwana monna  
O hodile o bile o tiile  
O ditetswana di qadikaneng seledung  
Sona sesupo sa ho tiya ha monna  
Tshupa nako ya ditshiu tsa hao  
Tsa ka ditshiu di ntshupa sebakana  
Pele maane hara banna

Ruri le nna ke tla o raha moritshwana  
Ke tle ke inkele thope sehalahala  
Palesa e ntle ntle  
Naledi e pela kgwedi  
Sona senakangwedi sa pelo ya me  
Ka ha ke ikgethetse yena hara dithope

## Monya Matsete

---

Ka re ho yena senyamo nana!  
Senyamo se buti nna  
Nna moshemane wa Letebele  
Motjhana Basotho sebele  
Eo yena a ileng a re: ka shwa!!!  
Ka shwa ka ba nna ka re phothololo!!!!

## 52. Nna Ke Tla Loya Motho

Ha re loya, re sirela matswapong  
Re kgukguna sa dikebekwa di laletse  
Empa rona re phetha wa rona mosebetsi  
E ya bo, yona pitso ya semaka  
Ho lepa le hona ho etsa bolao  
Ho re ya boi mmae a tjhethjhe  
Ba phuwana di bonolo bona ba itjhwelle  
Ka ha lefatsheng mona ha ho qellwanwe  
Nna ke se ke hodile hleng  
Na mojalefa wa ka ke mang?  
Ke mang ya tlang ho nka moqhaka ona  
Yena eo ya tla bitswa mampodi wa baloi  
Ka ha ke seo ke leng sona  
Ke lekako la monna  
ke bile ke kgantsha matla  
Ka ha nna ke mobe hampe mpe  
Ka ho otlanya thupa le lefatshe  
Ncwe ke ya hlapanya  
Ke re bana batho ba tla ntseba  
Makgowa a na ao ke a sebeletsang  
Ba tla itshola ka le leng  
Ke tla loya baeka ba timellwe  
ka ha nna masawana ha ke kopane le ona  
Nxa!

## 53. Senyamo

Senyamo ngwanana  
Wena thope e lebala le boreledi  
Tlalo le thellang sa bolele nokeng ya Senqu  
Moo teng ho sasankang ka bo Marokolo  
Ke re le yona Kidwi ka seqo  
Dilo tsa ho ikgantsha ka ho sesa  
Diqwedi tse hlwahlwa

Rona Basotho ba ha Monaheng  
Rona re ipelang ka papadi tsa boholo  
Dipapadi tse tletseng thuto le masene  
E be e ka rona re ya o lotha  
A the re mpa re bapala ka bolokolohi  
Sa bana ba masea ba bapala tsuonyana robala

Ke re senyamo!  
Senyamo se buti nna ntshonyana  
Ntshonyana kgutsana kgaitsedi ya Pinky  
Kgeleke ya ho ithoma seboledi sa ditaba  
Taba tsa maikutlo disisimosa mmele  
Nna mmoledi wa ditaba ntle le leeme

Senyamo ho wena morwetsana  
Wena ke tsamayang le lora le hara motsheare  
Motsheare wa lengeta hoja tsatsi le batamme  
O ntlhodisa taba e se ka ka letho  
Ke tuba dihaeya ntho tse kgolo  
Ke ho phofaka ka wena empa ke shebile

Senyamo bo wena mothepa!  
Ka re ya kgobohelwang a tlole  
Nna ke tswe ke mmona  
Ke tle mo etse dihaeya ntho ha di bonwe  
Ke tle ipake hore nna ke kgeleke nnana  
Ha ke itheke morwalo ke o jwetse  
Ke tswetswe lapeng le hafang ka nkatana  
Moo nama le moro di bonwang ka mehla  
Mme nna ke fuwe ka mona ka hanong  
Hore ya utlwanng a ikutlwele

Ntumelle ke itele ho wena motjhaufa  
Ke re senyaaaamo!

## Monya Matsete

---

Ka tloholo sena sa Bataung  
Ngwane motona ntjhanyana  
Tjhemane e kgahluwe kgatheng lena  
Leihlo le ile la fahlwa  
Mme jwale e hakolohile leleme  
Leleme le thella sa kgapetla la panana  
Ho enwa montsana, pabala twadi

Senyamo hle wena kgaitsemi ya motho  
Na o wa shwa o wa ikepela?  
Ka yee tlhankana ya Makwayi?  
Moshemane tswibila hara bomphato  
Lehare le beolang ntle le leeme  
Mme kgetlong lena le tobane le tshetsana  
Lekako ngwana ya molomo monate  
Ngwana wa ho tjhesa bahlankana dintshi  
Hore ba shwe le mantswe, ba mumufale  
Senyamo!

## 54. Rasekala

Rasekala qheku la Theosane  
Motho wa ho kgaba ka seemo  
Seithati sa leqheku, rafeshene  
Motho wa ho ja koto ka mehla  
Motshetshe o emme o totobetse  
O ka kgaola ntsintsi lepheo  
Ke ho ithata eo he motho

Rasekala ntata moholo wa Dikeledi  
Monna wa nkgono Setai  
Qhekwana le pelo nolo  
Qhekwana la bana  
Nkgono wa wa bohle motseng  
Ena motho wa ho utlwela bohle  
Le pelo e jewang lena leqheku

Empa mehlolo ya Rasekala we!  
Qheku le ratang botjha tshiu di ile  
Motho wa ho se ithe morwalo  
Rasekala wa bana, wa basetsana  
Teduputswa seqhala batjha  
Teduputswa motho wa maemo

Basetsana ba ya balwa  
Bao ho bona Rasekala a sa tsejweng  
O kgaba ka tjelete ka dimpho  
Majabajaba a pitsi ya leqheku  
O ferekanya methepa mehopolo  
Barwetsana ba sale ba ngwapana ka lena leqheku  
Moo le fetileng teng

Jo nna bo bokgeleke ba lena leqhekwana!  
Ka ntswe le phefa ba sephokodi sa lehlaso  
Ntswe le molodi la Rasekala  
Ho siileng barwetsana ba motse ba pelo di le kgubedu  
Ke mona le ona mohono  
Ka lentswe la ena kakapa ya thaba di mahlwa

Baleng la dipapadi teduputswa o etsa mehlolo  
O kabela sa lekejakejane la mohlankana  
O qothisana lehlokwa le tjhatjha e ntjha bahlankana  
Ka ha qhekwana ho tsofala le ratang

## Monya Matsete

---

Hoja moeka a tshwanelwa ke bokako  
Lekuka la monna enwa Rasekala

## 55. Podile Nkgwana

Modimo o re neile dinko  
Hore re tle re nkgele dintho  
Mme re fofonele sa dinyalasi  
Ka ha monko ke ona tsela ya ho utlwa  
Le hona ho netefatsa

Dinko di thabela lephoka  
Letsuka leo le dutlisang mathe  
Motho a qetele a kenya mothamo  
Hoja e ka o ja ditheohelang  
Mathemalodi dijo tsa dikgosi

He banna le batshabe banna ba matshepa!  
Ntho tse tshwehletshwehlang tjena  
Batho sao e kang makgethe ha ba a tsebe  
Ke re le bohleki bona bo pala  
Batho ba ho thabela bokgwahlapa

Letsuka lona ha ke sa bua  
Motho o nkgang ntho e se ka ka letho  
Monko o mona o hlokanng tlhaloso  
Eo e reng ha feta e ba re ikwala dinko  
Ka ha rephefomoloha ka thata  
Ha motho a ka feta feela  
Mme ho sala sebedu sebaeng

Basadi baleisang bana masea ntate Sebilo ke eo  
Monna ya nkgang podile nkgwana  
Monko o mobe be hara menko  
O pakang ditshila le bohlaswa  
E ka motho o phatsitswe ka sebedu  
Hore o tla dula a nkgang nkgi

## 56. Tlholohelo

Boinotshing ba ka  
Maikutlong a me  
Hare hare mehopolong ya ka  
Tlase tlase botebong ba pelo  
Moo teng ho runyang maikutlo  
Kutlo ha mmoho le kgopolo

Ka tla ka hlollwa bo  
Nna nthwana batho  
Ya ka ke nkuwe ke setsokotsane sa moya  
Setsokotsane sa ntsokotsa mme sa nkuruetsa  
Ya ka ke motho wa moya  
Motho wa pitso ya badimo  
E, yena ya laolang ka hlooho  
Ha moya o mo hlasetse  
Mme a sitwa le ho sisinyeha

Jwale nna ke tshwerwe ke mehopolo  
Menahano ya ka ha emphe sebaka  
Ka ha enwa motho ke fela ke mo hlolohetswe  
Tlholohelo e na eo e kang moya wa ka o wa kgaoha  
O kgaolwa jwalo ke pelo bohloko  
Moya o lakatsang ho bona moratuwa  
Yena ya tlišang kgotsofalo ho nna

O na moya ha o kgotsafale  
Ka ha ke maoba mona ha ke bona thope  
Ona mohaladitwe o ntlhokisang letshweya  
Ya ntshihileng sa lehlanya  
Ka ha moya o hana ho phutholoha  
Ho fihlela o bona ena palesa  
Mohaladitwe hara dithota

Na moya towe o tla mpha sebaka neng?  
Na phomolo ke tla e bona ha ho entse jwang?  
Ka se sehlooho sa moya  
Ka tlholohelo e kaale ngwaneng wa ditjhabeng  
Wa tla ha hapeha moya ka  
Sa nonyana e hapeha ke tse ding  
Ya ka pelo e nkehile  
Ke yenwa ngwana wa ditjhaba

## Monya Matsete

---

Montsana a ko o mpoelle hle  
Hore na ona wa ka moya o phokwa ka eng  
E le hore o tle o kgutse ho uba  
Ke tle ke tsebe ho fumana kgotso  
Ka e na tlholohelo e kaale  
Ka wena kgauta e phatsimang  
Ka ha w a ka moya  
O utlwa bohloko ka mehla  
Ha ke nahana ka wena

## 57. Nkele Morohong

Ka nyala mosadi  
Ka nyala mathata  
Ka ikenyetsa mokgoka kgwale  
Ntho e se ka ka letho  
Ka tla ka sulafallwa ke bophelo  
Ke mosadi ke mo nyetse ke mo rata

Ka kgahlwa ke botle ba kgarebe  
Ngwana ya lebala le kganyang  
Sa seila tsatsi wa tshomong  
Ke re ngwane motle sebele  
Ka ha thope tsa basotho botle di boabetswe  
Ruri ya kgahlehang motho

Ka nnete nnete ya mmakoma  
Ho se tsebe ke lebote  
Hore tlasa botle boo ho rena pherekano  
Hore pelo ya thope ke kibiditla ya lejwe  
Ngwana ya pelo e ntshotsho  
Ngwana ya hlokang lerato  
Moferekanyi wa sebele

Hee le rona re ya iketsa!  
Ka ho tsamaya re kgahlakwa mona  
Re tsamaya re thola batho re sa tsebe moo ba tswang  
Le hore ha na ke kwahelo tsa e fe pitsa  
Hara naha e jele boya  
Re thetswa ke botle bo bonwang mahlong  
Re lebetse hore metse e metle diotlwana

A tla a ntuba motho  
A ntshetsa le ka moso  
Hore ke tle ke nyonye botle ba mosadi  
Ke nene tshobotsi, ke nyefole mosebetsi wa mmopi  
Ka ha bona botle bo fupere mekaefete  
Masa a kokometse, mehlolo ya lena lefatshe

Athe botle ke ntho e mpe tje?  
Ba mosadi ya tlang ho tsejwa ke bohle  
Ngwana ya hlokang thuto ya hlokang tlhomphe  
Kenang bohle lemati le butswa  
Le buletswe ke re le yona tsipa schoole

## Monya Matsete

---

Ha feela o le monna o amohelehile  
Ho e na thope ngwana ya photholehileng

O bo tshabe botle!  
Bona bo hlokisang motho maitshwaro  
Bona bo mathisang motho  
Sa seotswa se phetha pitso ya sona  
E ka motho o photholehile  
O se a bile a sitwa ke ho itshwara

Ausi nkele morohong  
Yena mosadi wa ho siya lapa la hae  
A tswa tjoro a leba moo monate o leng teng  
Ka ha ausi nnyeo yena o motle  
O bile o ratwa ke banna bohle  
O bapala papadi ya ha re robale motjha o tjhele  
O butsi ke kena moikutlwa pelo

Motho wa teng o lebetse  
Hore mona ke lefatsheng  
Mme tsohle di na le moputso  
Botle bo ya feela motho yena a sale  
A sale a llela metsotso  
A re hoja ka kgaba ka botle ba ka  
Hoja modimo a ne mphile lefa  
Ke le twadi ke le seilatsatsi  
Ka mpa ka nonosa botle ba ka  
Mme kajeno lena ke lla sa mmokotsane

Ke setse ke le hase kgutsana  
Ke hloka ke re mehaswana feela  
E ile menate ya lefatshe  
E ile le botle ba ka  
Mme ke setse ke le maqakabetsing  
Le monna wa ka o ntshiile  
Monna batho o kgathetse ke pere  
Letrapsukisi la mosadi  
Ngwana ya hlotsweng ke lenyalo  
Sa kgupi e rahwa ke monono  
Ka ha a llela menate ya lena lefatshe  
Leo kajeno lena le mo furalletseng  
Mme yena a setse maqakabetsing  
Ke boo bophelo ba mosadi ya hlokaang nnete  
Nkele morohong mosadi wa bohle

### 58. Ngwana a re Tentsha Tsheya

Ba tenne dithethana, matswele ke mabinike  
Tswele la ngwana mosotho botle  
Motshohla ditaba a di beye powaneng  
Tswele la ngwana mosotho phatlalatsa  
Taba di mosenekeng, moro kgotla ha o okolwe mafura

Ngwanana bua taba, o tswe ka tsona  
Haeso ho thwe taba di mahlong  
Motho o bonwa ka diketso  
Mme la hao letswele le bua dikakata ngwana ka  
Tsa hao ditlhafu ke buka e phetliweng  
Taba di mosenekeng, baholo ba se ba wele ka taba

O hanne o lomahantse meno  
Wa re wena o mosetsana wa mosotho  
Ya ipelang ka borwetsana ba hae  
Mme wa hlapanya le ka baheno ngwanana  
Wa re ncwe le modimo  
Empa wena o swetsitswe ke sefuba sa hao  
Ka ha letswele la hao ke yona kgaebane ya hao

Baholo ba itse ba o sheba hang feela  
Yaba ba qetile ka wena  
Yaba bohle ba kgodisehile ka wena  
Hore o se le kgaba le ileng  
Ngwana ya latswitseng matshela dinokana  
Dijo tsa ho se jewe ke bana  
Ngwana wa ho ingwathela sengwatho  
Pele a fuwa ka molao ke baholo ba hae

Jwale ke wena enwa o dubisa batho thankga  
O badisa ka moo o leng ngwanana ka teng  
Ka moo o phethahetseng ka teng  
O lebetse hore sekgukguni se bonwa ke sebatladi  
Mme tswele la hao ke sesupo sa diketso tsa hao  
Seipone le lebone la bophelo ba hao  
Mme la hao letswele lona le ponne  
Ponang sa poone mariha ho bata  
Le supa maswabi le ditlhong tseo o leng ho tsona  
Maswabi a ho fellwa ke borwetsana empa o ntse o le lefetwa  
Sekgobo sa ho tswalla lapeng leno

## Monya Matsete

---

Na ba hao batswadi ba tla reng ngwanana  
Ka ho bona setloholo empa dikgomo ba eso ho di bone  
Ka ho bitswa maqheku empa mokgwenyana ba sa mo tsebe  
Empa kgomo ya selelekela e sa ka ya bonwa  
Le wena o sa ka wa jeswa kwae mme wa bekwa  
Ruri o re tlontlollotse ngwana ka

E tlare ha banana ba kgiba ba keta  
Ba kgaba ka botjha ba bona mme ba thaba  
Ba kunketsa mme ba qhelaka  
Wena o tle be o le lekgaba le ileng  
Ngwanana ya kgesehang setjhabeng  
Ngwana wa lapa le nenwang ke bahlankana  
Ka ha o sa ka wa kgaba ka botjha ba hao  
O dihile letswele la hao ka mabaka a fokola

Jo nna wee! monate wa sejo se patuwe  
O feta le tswekere hole hole  
Hore batho ba iteke menwana sa bana ba masea  
Ba be nne ba iphethe kgafetsa  
Ka ha ntho e monate e ya phethuwa  
Hore monate o tswelelle  
Mme bo nkeka ba natefelwe ke hona

Tsa hao dirope ke kenang bohle  
Di buleha ha bobebe mme ke kobo anela  
E ka baleng la sepotong habo kgera  
Moo ho kenang ke re le tsipa schoole  
E ka ngwana towe o louwe  
E ka o feteletse mme ha o kgone ho itshwara  
Kajeno le na tswela la hao le o senotse  
Mpa e tla setalla sa kolobe e kgotshe seretse  
Sona sesupo sa ngwana ya sa mameleng

Mosotho o boletse ha a ne a re:

### **Leshala le tswala molora**

Ka ha ba hao batswadi ke dikwakwariri  
Batho ba itlhomphang, dinaledi  
O lebetse hore bona bophelo re bo phela hang  
Mme tswela la hao ke mokgabo  
Mpho e tswang ho badimo ba heno  
Sesupo sa ho kgetheha ha ngwana ngwanana

La hao letswele ke thohako ho wena  
Mme o rohakile ba hao batswadi

## Monya Matsete

---

O rohakile leno lelapa  
Wa tlisa sekgobo tlung ya ntatao  
Wa bontsha lenyatso ho batswadi ba hao  
Wa bontsha tello ya thuto ya setjhaba seno  
Ka ho hloka tsebe ya ho mamela  
Ka ho hloka tlhomphe le seriti  
O feela o le ngwana e mobe ngwana ka

## 59. Kodi ya Malla

Ke itse ke ituletse nna nthwana batho,  
Ke robile monakedi,  
Ka utlwa ho bolediswa pabalo ya mme, motswadi.  
Ho thwe o imetswe, o mahlabeng.  
Ntho e se ka ka letho.

Ke itse ke sa ile le kgongwana hodimo,  
Ka lora nkgono, setswala ntate.  
A mpoella ka moo ba hlokoletseng ka teng.  
Athe eo ke pehi ya ho feta ha mme wa ka ya ntswetseng.  
Pehi ya lefu monyaparetsi.

Ka hlollwa, ka hloleha le ho botsisa,  
Tlhalosetso ya sesosa sa koduwa ena.  
Moya wa ka wa thulana, pelo ya me ya sisa.  
Kgapha tsa rotha, mamina ona ka a hlwephetsa.

Ruri ya ka ke toro.  
Ya ka ke tla tloha ke nyaroha, ke phaphama.  
Torong e na e soto.

Lefu o moleko.  
O hlokisa batho kgotso.  
O maqakabetsi.  
O mohanyapetsi.  
O mohono.

Ka tla ka lebona nna.  
Ka ho rweswa morwalo o boima.  
Morwalo le sekgopi sa ho bitswa kgutsana.  
Kgutsana mohlori.  
Kgutsana moleleri.  
Ngwana wa ho hlopheha.

Jooo lefu weeee!!!  
Wa tla wa nkgolwa,  
Wa tla wa nkimetsa.  
Ke sa ntsane ke le lesohana,  
Empa ke se ke bitswa kgutsana.

Mme o ile a sa tsebe ke re le setloholo.  
Ba ka bana e tla ba mehau.

## Monya Matsete

---

Ba botse ka nkgono, setsohatsana.  
Hae moholo botshabelo.

Ke re tsela tshweu ho wena mme,  
Motswadi ya lerato.  
Lerato le mofuthu wa hao,  
Re tla di hopola ka mehla.  
Re di hopolela tlhomohong, meokgong.  
E le mehopolo feela e setseng.

Ke re ithoballe ka kgotso ngwanana.  
Ka ha ho thwe lefu ke ngwetsi ya malapa ohle.  
Ya hao kano o e phetile.  
Wa hao moqhaka o o fumanne.  
Le na lebelo o le mathile,  
Mme o fihlile pheletsong ya bophelo.

Re roballe ka kgotso koo hae badimong,  
Fatsheng la bahale le marena.  
Ya hao ntwala o e hlotse kgaitsemi ya Taung,  
Ngwetsi ya Kwaing.  
Jwale o Modimo, modimo wa batho.  
Ha re roka re re modimo o motjha,  
Re rapelle ho wa kgale.  
Re tla be re hoa ho wena mme.  
Re re ha e be nala, e be kgotso.

Re puka pula, re bidikisa monono.  
Ke re lesedi ho wena, tloholo sa Moshoeshoe.  
Lesedi le re okamele rona tswala ya hao.  
E be kgotso, pula le nala.

## 60. Baby Girl

Baby girl  
Wena twadi tswibila  
Serumula seletswa sa melodi  
Wena wa ho ntsha lehlaso  
Melodi ka melodi  
O tlatse sebae ka lehlaso  
Bashanyana ba fapane hlooho tsena  
Ke wena sexy thing

Baby girl the adventurer  
Motho wa ho re makatsa  
Wa tlatatlala le lefatshe lohle  
Wa ipokella makgabane ohle  
Wa nto itshupa ka botjhatsi  
Ka mangolo a boima a thuto  
Ditlhaku tse kgolo kgolo  
Tse ka nqane ho tlhalohanyo ya ka

My baby girl my sweet girl  
Baby girl wa kasi, wa motseng  
Ko loxion dladleni  
Re dula re camtha nako tsohle  
Re bile dlala ka rengas  
Scamtho sa majita ha a kopane  
A buwa le bo my-bebeza  
Bo baby ba tje ka wena baby girl

Na kasi e ka ba kasi na  
Ntle le wena baby girl  
Wena honey, my sweety  
Hobane o sweeter than sweet  
Better than chocolate itself  
Ya the highest grade ever  
Hobane wena o le my bebeza  
Baby girl wa ka, wa ko kasi

Ola magents, ola bo baby  
Fede? Nna ke monate  
Ke ya qhoma ke ya ikgantsha  
Today ke le highsa  
Ke qhoshile ka baby girl  
The sweetest girl ko kasi

## Monya Matsete

---

Mohla a neng a nthwesa the crown  
Ke ipala hara bomphato  
Nami futhi, been there!

Always laughing, always lively  
Free spirited like this life o ya e busa  
Sa majimbos ko Black Door  
The hottest joint, the in thing  
A groova, bana ba lahlile  
E le abuti buy me six pack and I am yours  
Only for tonight, this evening  
Thank your lucky stars  
Whatever you like, whatever you want  
Name it and it's yours  
Six pack is my price

My baby girl ka botle  
So gorgeous, so cavertious  
Intoxicating beauty  
Sexy, o pakile  
This baby girl wa rona  
My baby girl, our baby girl  
Baby girl wa majita ohle kasi

She is so gentle, so kind  
Lerato la hae le ya kgaphatseha  
So much that it must be shared  
So generously among magenge  
Ke baby girl wa rona eo  
Sweet, sensual  
Baby girl, thekene ya bohle

### 61. Nna Enwa!

Nna Enwa!  
Nna Fezekile wa ha Futhwa  
Nna tloholo sa Matebele,  
Mkwayi, Tshawe, Khawuta,  
Umadala mbejane, potsi ka sebele.  
Potsotso ya moshemane, sehanka;  
Moshemane ya dikoti marameng.  
Pososela ya tlhankana,  
Kgeleke seithati.  
Mothepe ba mmolelang.  
Ho phethehile, badimo ba boletse,  
Ba re eo ke ngwana hlooho ya badimo.  
Tshiya le tshika ya lena leloko.  
Makathiwe uFezekile, ngoba ku Fezekile ngenene,  
Ntshonyana, ngwana setsoha le pelo ya maobane.  
Tebele le antseng tswela la mosotho.  
Motjhana Bataung sebele,  
Lesedi.



Fezekile Futhwa ke Software Developer ka mosebetsi. O holetse mane Qwaqwa motseng wa Bolata, teng moo a qetileng dithuto tsa hae ka lemo sa 1993. Ha jwale o dula Gauteng.

O ka tseba ha holwanyane ka Fezekile ka ho etela dibaka tse latelang:

- <http://www.futhwa.org.za/>
- <http://www.nalane.org.za/>



ISBN: 978-0-620-46377-5